

養餘山房詩鈔

趙雄封署

遊龍塔

養鶴山房

PL
2542
L745
Y3
V.1

序

吾粵地濱海其交通四達善吸海外文明者首香山而
自昔文物亦恆爲一時冠有明中葉泰泉黃文裕公以
博學雄文鳴詩人南園後五先生若歐大任梁有譽黎
民表吳旦之徒皆出其門下至近世而有詩人黃香石
與譚康侯張南山二人齊名山川之精氣有開必先醞
釀久而必一洩其信然歟余甲寅夏承乏本省高等師
範學校國文講席識劉君芙初芙初香山人以教授數
學誠懇有法著稱學者所翕然尊曰劉先生者也暇日
芙初致其王父少荊先生之命出詩稿屬審定爲之

Asia

序余惟古之君子不得志於時則往往垂空文以自見
匪特其生平之所懷抱不忍以自湮沒亦將使後之人
讀吾文而曉吾志而於修身立志善世澤物皆得以沾
溉於無窮也詩之爲道豈徒曰篇章雕鏤之工而已其
大者則作者之性情趨向節概舉以見焉環其身數十
年之所處其時其地其人與其榮榮大事舉以聯系而
並呈焉而其爲體又一唱三歎抑揚抗墜入人易而感
人深有非他文所能及者故曰詩言志又曰詩可以興
可以觀先王以是經夫婦成孝敬厚人倫美教化移風
俗巡守所至則命大師陳詩以觀民風蓋有由也自漢

以來作者衆矣其傳世之久近感人之深淺蓋一以合
於茲義之羸縮多寡以爲衡 先生惟行和易貞介絕
俗孝友行於家而仁愛及於鄉遇雖未顯而開門授徒
有以自樂好修劬學篤老不倦其所以爲詩之本者已
具矣及其縱心孤往攄之篇什則家庭之愛朋友之好
遠而讀書懷古之所得近而憂時感事之所至無不託
物寄興一一稱量而施而其刻畫呈露往往纏緜悱惻
驚奇而可喜 先生之言志歟其將有興且觀者歟皆
於是取焉已輒近道德淪喪風雅銷歇 先生生於風
會易變之鄉而篤古自好有以紹先輩之遺風其足爲

後生法式有非流俗所能窺者吾於是又有以知芙初之學日求新而卓然不蹈時趨者其淵源遠有自矣遂書此以諗世之讀先生之詩者並以質之先生以爲何如也

民國六年四月惠陽楊壽昌謹序

養餘山房詩鈔

香山劉珩少荆撰

乙卯亂後作

腐儒無術濟時艱
野鶴身同任往還
已見烽煙消遠郡
空存志業仰名山
遊方局愛尋僧話
抱病門常謝客關
賴有書叢供歲月
未應蟬蠹笑癡頑

勉懷

衆濁奚堪詡獨清
頗嫌矻矻尙無成
家貧儒業堅心守
世亂文人敝屣輕
講學慙同門外漢
救時愧乏腹中兵
寸陰今後當勤惜
漫逐浮名過此生

村居

黃昏耕犢返繫向柴門裏把酒話隣翁桑麻時自喜

山居

日午無叩關高枕白雲臥黃犬吠松陰知爲樵牧過

野燐

天圍平野暗荆榛雨後幽光見水濱是火是星渾莫辨
一時愁煞夜行人

岐海竹枝詞

端陽攜妓看龍舟扇影衣香雜沓遊歸去南河燈火亂
琵琶深夜又清謳

青蕉乳滴徧園基八月秋風上市時
莫便移船欄尾泊
明朝三六是墟期

西河濬淺夾沙田潮長魚鰕躍岸邊
網得半籃供晚市
卻輸撈蛤賺多錢

野芋山薯聚各村東西小艇似蜂屯
擔羅更遣街頭喚
雞卵同收落澳門

曉山招同康海珊集新塘分得午夢感夢二題

午夢

一室簾垂戶半扃晝長炎日逼疎櫺
琴橫短榻茶剛熟
香爆熏籠酒未醒欹枕怕聞鶯斷續
擁衾翻愛蝶伶俜

生憎鸚鵡檐前喚無語慙慙對畫屏

感夢

何來愁思亂心胸天上人間路似逢入世眞同泡影幻
多生難免垢塵封遊兼蓬島三千界恨結巫山十二重
一榻蘧然原易覺瑤池誰共話仙蹤

丙辰試罷寄曉山

小小黌名志莫伸頻年足別究何因最憐負擔歸家日
歛卻愁顏暫慰親

得失疇能兩字捐愁聽風雨倍凄然漫云翰墨無靈物
吾輩還從此著鞭

蘇臺懷古

報仇於越告成功天意那知反覆工臣虜詞卑香徑外
美人顰感畫簾中秋來麋鹿尋遺迹夜靜笙歌憶故宮
爲是閭門回首望千條楊柳尙東風

鄴中懷古

火德衰微漢運隕梟雄睨鼎擅鹽梅三分得國奸天命
八斗生兒美逸才漳水賓僚遺韻在銅臺聲伎後人哀
西陵此日憑誰望疑塚空埋亂石堆

春日康海珊偕張星海黃祝三到鄉

別離纔一載天末屢徘徊慰我索居苦喜君連袂來酒

浮春甕熟花對故人開況有梨園樂歸帆莫便催

時鄉中
演劇

塞外曲

寒夜雪霏霏將軍罷戰歸遙憐閨夢冷未忍著征衣

古別離

曉起聞郎去魂消淚溼衣願將魂化蝶一路傍郎飛

投軍行

太平醋玩嬉韜鈴忘素習萑苻一朝起摧陷連城邑郡
縣下兵符召募軍營入游惰不自量奮臂圖階級兇燄
劇彌天徵調倉皇集閔然兵刃交輒以一當十驅羊餓
虎喂反被乘虛襲尸橫江海浮血濺衣履溼轉鬪力已

疲南冠時見繫體掠無完膚腹枵苦絕粒性命輕草菅
死生繫呼吸浩劫沙蟲埋殘骸那可拾痛哉父母心生
兒仰供給垂老失所靠輾轉溝壑及嗚呼人生世幾見
功勳立試看沙草邊髑髏枕山隰纍纍先塋遺墓門誰
拜揖天陰風雨來新故鬼同泣死者骨肉糜存者虺蛇
蟄烽火有時消逃亡罔加輯轉瞬投軍人寇亂警復急

芭蕉

最宜涼雨透窗紗滴入秋懷韻倍嘉濃綠暗分三徑竹
深紅別占一枝花芳心欲吐隨舒捲碧影初圓半整斜
記取綠天行坐處書成葉葉走龍蛇

孤館

孤館烽煙候燈前策尙陳夢回常起夜花落不知春報
曉憑檐鵲爲餐愛野蕪何人甘守拙亂世正宜貧

磨劍

韜匣鋒鋌歛平生耐守眞雄心猶故我讐恨不因人假
以拂拭意聊酬肝膽親琴書相伴久壯志尙容伸

試馬

棧豆何心戀人咸千里期騰驤終遠到伏櫪未長辭歲
月從增齒風塵肯受羈自今看縱轡撫髀復奚悲

秋後再赴佛山應試留別新塘諸子

庭梧疎雨滴初沈，便擬黃花酒共斟。
鴻爪忽驚尋遠跡，驪歌空復動愁心。
待時璞玉還思獻，入爨焦桐未賞音。
他日扁舟歸訪戴，高齋風雪補聯吟。

九日偕豹卿曉山虎遜巖登高

重九登高處近鄉，惟此巖秋花根石洞山。
雨落松杉逕仄遊，人怯崖低古佛嵌。
同來憑眺慣我友，藉兼咸

乙丑春偕何印川家秋帆豹卿曉山香府往桂洲
觀劇因買舟遊樵登舟後連日風雨越三日始

抵官山

人當風雨閉門臥，我反風雨出門遊。
名山有約不可失

肯使山靈笑逗遛
揭來拏舟百十里
三日江行雨不止
篙工鼓棹向寒爭
四面瀰漫但江水
船艙坐對日圍爐
裘茸欲落霜花麤
愁雲黯黯天半走
沿流泊岸沾醅醑
推篷遠覽江村景
一碧微茫連萬頃
未須巖洞共探奇
到眼煙波足心領

白雲洞觀瀑

昔聞白雲勝今叩白雲關
白雲滂鬱滿巖間
奮衣躡屩同躋攀
不聞泉聲嚮潺湲
頗疑歧路誤蒼顏
飄然隨雲行復止
豈知瀑在重巖裏
重巖裏暴雷起
玉龍飛下滄溟徙
一條界破兩岸分
坐來雲洞不見雲
但覺洶騰砰

磔振巖谷峭壁削天險如束巖前噴沫雨驟飛巖下奔
流雲競逐邈想山靈橐籥未許窺爰從峯頂高挂水簾
令人思

訪翠岳

興晨陟高峯偕友窮幽邃行行越雲陸還疑在平地當
春花氣襲時覺衣芳膩不辨何花香花原不關意峰隕
得深磴閣曲行如隧懸崖飛瀑奔蜿蜒玉龍戲一綫石
迸出尤莫測所自風輕煙欲散雲冷陰疑闕仰視一巖
低攀躋亦匪易捫蘿出其上窺天猶井墜才下度石梁
俯瞰防顛躓回顧見幽花林壑增妩媚

元旦

茱觴柏盞幾同陳又值東皇第一辰
燈市兒童忻得歲桃符門戶競占新
人從爆竹聲中老瓶供梅花座上春
到底天心論剝復年光雖換總成塵

水仙花

玉骨清香迥出塵梅花修到別全真
幽閒未許通巫夢淡冶端宜步洛神
石上因緣那有恨人間几案自生春
白衣雅稱山人度漫誤桃源學避秦

送春

九十韶光付落暉園林回首惜芳菲
鶯花管領來何暫

萍絮飄隨去似飛
社燕有情還共住
遊蜂無主向誰依
陰陰碧草池塘路
夢斷人間綠已肥

次韻小明叔古意

君居大江南
妾住大江北
相隔一水盈
不見彌相憶
託言爲夫妻
懽愛兩情得
君心金石堅
妾貌花顏色
顏色易衰暮
金石堅如故
但願持此心
白頭無異路
妾容雖已非
君情仍獨固
花落歎飄零
甯改金石度

遊光孝寺觀鐵塔

訶林舊傳虞翻宅
地近六榕擅幽僻
千年古刹不改觀
賸有鐵塔諸遺迹
鐵塔始自南漢朝
闍宦得志氣彌驕

珠渠銀殿趨侈靡餘事佞佛誇富饒造成此塔藏一室
循廊轉入閤如漆摩挲尙存僞號鐫想見當年殫物力
金碧剝落繡紋青古苔斑駁紛縱衡不鑄刀劍鑄寶塔
頑鐵幸免供淫刑降王事去國步止昌華故苑空禾黍
巋然層構傍僧寮風旛搖動塔鈴語

秋日登鎮海樓

危樓高峙俯佗城入目秋光一派清山色侵雲青尙疊
江流浴日碧無聲桅檣遠立多夷舶烽燧纔消愴客情
五嶺南來凝望處登臨直欲請長纓

山行遇雨

黯黯濃雲四面平
當頭大雨忽盆傾
溪流暴漲橫途溢
頻聽輿夫踏水聲

流水衝橋灣復灣
癡龍猶在黑雲間
遙看晚舍炊煙起
一角天光露遠山

花朝偶作

未到春深便掩門
茶鐺閒設愛泉溫
詩緣落寞吟懷減
琴拚焦枯舊調存
氣煖硯潮蒸匣潤
雨餘簾影逼窗昏
苔階幾日添新綠
幽意如人靜不喧

亂後再遊五仙觀

何年叱石復成羊
座上仙人劫亦傷
觀裏桃花無一樹

空教前度悵劉郎

偕弟瓊峯姪雲裳甥楊展廷入學院觀九曜石

學署清嚴地深藏古蹟傳落星移粵海異石表南天補

缺還須訪

石數得八聞其
一在藩司署內

探奇自有緣

時學院重修

題名人拜識字辨

米公顛

有米元
章刻字

蘇東坡先生硯

并序

并歲辛未客羊城偶過廣府前見有持玉器數字
此硯出售硯面上刻有銘詞左鐫蘇軾二字

背刻一大方印篆石渠閣記四字下題元符三
年孟秋月製分兩行字兼真草詢其價約要十

金適囊空姑置之以三一洋之復見於雙門底因并
拈玉帶扣一統戲以

售不時寓館不遠遂取歸寓其值迨往時其人
已不見并各物亦席捲去意其嫌價賤反悔乃

懊忽有詢以後何故呼則余視之取卽其後人有過持客近包前形將
所售玉各扣持弄追不賠償何以追不折及斷擲喪而返行余故
急收丁玉扣物往追不賠償何以追不折及斷擲喪而返行余故
我曰汝玉扣已斷價遂不能銀四錢減去半翌日持往與
硯店配匣反覆審視以語余友託爲出真贗問可知值但價
幾何店配匣反覆審視以語余友託爲出真贗問可知值但價
石質溫潤形色亦開晦沃以舊硯視此俱瑩然決未非
近時之物吾店亦有三四以舊硯視此俱瑩然決未非
以肯售如果出吾當以價二十金酬之以余笑告
必實店主詫爲奇遇余謂價值二十金以余笑告
不得之誠不能意外然未可云奇遇也惟物有得有
不得之誠不能意外然未可云奇遇也惟物有得有

名賢墨蹟紛摹倣嗜古往往受其欺米家畫本半贗鼎
尤物矧屬舊硯規眉山一老昔被竄蕭條萬里瓊儋馳
桄榔菴裏坐無事手寫八賦卜歸期裝殊陸賈鮮珍貝

敝簾只有文房隨端溪處士久相契吟詩頃刻無暫離
龍尾鳳咮徧評品一一商學同護持海外交遊客有贈
深藏轉致南邦遺流傳迄今將千載幸免估舶落波斯
我生慣作羊城客偶然入市縱遊嬉珍翫炫耀迷五色
法書名畫尤居奇就中落寞一卷石瞥眼倏覺神驚疑
摩挲上有銘詞刻銀鈎鐵畫藏蛟螭字半模糊猶可識
沙土痕漬質無虧詳看歲月元符紀方印居中篆石渠
形同覆瓦色溫潤劍埋似久寒泉儲是時眞贋難猝辨
酬以賤價姑餽之初擬重金始可購何意作合偏逢時
計值無事腰纏費儼然入手比璠璣攜歸詫衆爭傳玩

奚異暴獲貧家兒從來物有意外得河豚豈必混他魚
髯翁貺我知何意學書權且快臨池

余屢躋鄉科偶閱新聞墨戲成二十六韻自嘲

當代重科名爲文不容拙制義盛先朝元鑑矜祕訣近
溯棘闈後紛然墨選列快覩摹風氣細繹磨心血伸紙
肆浮談弄筆憑勦說羹調味取濃樂奏音無節規倣亦
云工法度奚知滅趨時蟻附羶逐好蠅營熱欲語不差
雷構思同捉月匪圖大手稱但供時眼悅鄉國屈賓興
主司衡優劣穩卜利器投倏爾鋼鋒缺舊調已無靈新
科旋改轍戀棧笑鴛鳴搬薑嗤鼠噉事誤椎一擊道反

肱三折根柢務蟠深義理懲剽竊經術固當窮史映尤
須撝憂憂去其陳汨汨來無竭金期良冶融玉俟昆刀
切精視貫蠶輪探珠向驪穴機法踵王唐思力邁瞿薛
勤作菑畚耕庶堪蕪穢絕金鎬刮目盲珊網羅才傑名
藝版頻鐫奇文人競閱遠可紹典型近亦樹圭臬何持
敲門甄暗裏常鬱結

曉發北渚

港小橫通海舟行駛覺輕涼風秋轉勁薄霧曙遙明趁
市漁船急迴帆宿鷺驚夢醒歸客易計日倚閭情

癸酉除夕

爆竹聲傳里舍多宵深燭影動陽和身閒最樂庭幃侍
境淡奚嫌質性磨已厭秋闈名念縛尙逢春節醉顏酡
明朝四十平頭屈壯歲韶光轉眼過

甲戌復就館

纔經一載擅優游爭奈饑驅覓館脩信是骨頑終莫變
此生勞分合難休

硯田雖小亦生涯餬口能安境便佳館穀何曾輸五斗
算來差勝折腰儕

拱把微材未易栽漫誇樂育有朋來師門昔受金針度
尙憶春風妙化裁

誘掖原無定見生文章要貴善持衡祇今壁壘翻新樣
信口雌黃莫妄評

懷曲江張文獻公

冠冕天南百粵中巴陵一祭恨無窮秋高海燕巢猶在
國變征鴻迹久空庾嶺至今遺廟祀騷壇於後肇宗風
千秋鑑獻思先見曲突何人爲表忠

菊燈

花作圍燈燈亦花光明色相兩無遮天花散後燈誰主
傳在東籬處士家

菊枕

一囊香冷愜秋心
高臥眞堪蝶夢尋
莫訝曲肱貧士慣
牀頭今已滿黃金

解館示同學諸子

業精原切共磋磨
絳帳春風抱愧多
鍼度自知無善術
材因何礙有殊科
經書未解遺糟粕
文字要期脫白窠
舉贈同人惟一語
莫教功力悔蹉跎

文章自古說師承
我愧雕龍譽莫憑
涇渭同流能辨否
水鹽有味得知曾
持躬祇貴心毋放
立品先求氣不矜
昨日階前微雨潤
苔岑依舊迹堪徵

寒夜

獨坐數長更殘燈翳復明朔風酸刺骨冷雨溼無聲往
事難成夢新愁輒欲生呼僮煖濁酒且對瓶梅傾

四十初度遣懷

潦倒西風近十年槐花幾度笑人顛添來歲月都如故
寂守叢殘亦可憐壯志未消容久晦浮名縱獲詎堪傳
賤貧何必非清福底用丹爐擬學仙

堂前杖履愧承歡色養由來古所難婚嫁漸當勞夢寐
旨甘何以慰盤飧硯田歲稔資仍乏病鶴長調力易殫
安得置身蓬島上稍沾升斗賦陔蘭

商復祖嘗偶成二十韻示弟瓊峯兼勗堂弟夢樓

生非自空桑人豈忘乎祖堂構有其基烝嘗視如土門
祚歎衰薄子姓多參伍罔念前人艱妄欲公產擄私佃
甘爲梟霸耕幾如虎分崩歷多年經畫曾無主享祀缺
春秋墳塋圯風雨捫心夜難安擢髮罪誰數既往不堪
追迨今宜亟補盡返汝陽田重訂宗盟譜約束法須嚴
綢繆力共努豈因崇本根竟至縱尋斧當守敦睦條毋
令馨香吐冠裳思在昔俎豆存隆古翼翼奉明禋兢兢
罰童毀秀者業詩書樸惟安農圃歲歉苟拮据惠均及
庾釜恃頑仍緬規重責羣鳴鼓持此慰冥漠勝彼榮圭
組亦使行路人庶莫予敢侮

穆宗皇帝輓詩

國事多艱口冲齡踐阼年山河收半壁

同治三年克復江南全省十二

年又平等處復

宗社仗羣賢四海憂初減

靖時各省盜氛俱惟臺灣未平

重

熙慶特延何圖逾一紀

龍馭倏賓天

孝治光前業偏令數易窮紀元符

聖祖

登極與康熙

同享國及初宗

本朝定鼎後雍正始稱宗而享國亦十有三年

冊立思賢后

時

二婚市年

晨昏戀

兩宮遺黎長歎息徒悵鼎湖弓

小明叔目園詩鈔顯後

家藏珠玉尙遺編

先十二世祖公著有醉夢草詩稿

繩武騷壇亦象

賢歲月閒多供嘯詠滄桑閱後感雲煙老爲農圃饒清

興臥對溪山憶舊緣一卷吟成梁父調管教梨棗遠流傳

羊城竹枝詞

劉王塢裏春草生越王臺上秋風鳴番山今古一輪月
照落珠江幾缺盈

西湖沈卻九曜星不見仙人降楚庭惟有清泉九眼井
年年看似落星形

酒前茶後叙寒溫一嚼檳榔便出門握手訂遊花埭約
琵琶箇晚定消魂

一燈長臥在牀間鶯粟頻來稅海關郎愛食煙儂愛睡

卻愁呼吸損郎顏

約伴西湖笑倚肩
大家小戶競珠鉤
拈香共賽金花會
若箇宜男得喜先

冬寒蟋蟀瓦盆拋
又買金籠挂樹梢
歸德門前聲聒雜
四時都似鳥回巢

舟行省墓夜泊濠涌步頭

夜泊孤舟靜將沈
月半弦星低明遠
水沙淺亂平田約
畧江邊樹蒼茫渡口船展坐懷麥飯獨思未成眠

龍泉行

并序

叔小
面明
俱有
有古
一劍
線一
凹長
入約
可以
三尺
屈闊
伸纔
匣五
亦六
木分
質劍
堅心
樸

傳首尾皆銅嵌中東畦公遺物已歷三白餘年叔

藏諸內室不輕示人丙子春讀叔詩始知有此

劍卽過叔處請觀捧匣驚喜拔視古質斑然洵

數百年物也據叔云每風雨夕劍輒有聲惜劍

首遺邵銅獸頭一然允足爲家寶矣

流傳古器世寶惜輕投恆恐招人妬吾家有劍遠祖遺

事等杯棬同愛護匣鐫漢篆曰龍泉在昔是否歐冶鑄

斬蛇芒碭傳沛公三尺居然符其數豐城氣燭牛斗間

雷煥當年辨豈誤青鋼百鍊隨屈伸土花駁蝕疑廢錮

得此未知自何代家本業儒鮮玩具此劍流落伴琴書

鄴架深藏混蟬蠹忠厚世洽鄉閭評睚眦當無不平吐

吾叔好古日摩挲肝膽相依歷朝暮裁詩獨自倚長吟

酒酣每作良友晤寒窗拂拭硯同磨價值千金誰卻顧

及鋒偶爾快平生秋草甯容伏狐兔

咸豐年間紅國倡亂叔曾奉憲督勦

時平姑暫斂光芒奕奕精神尙奔赴等閒未許俗眼窺
起舞猶聞奮餘怒我年四十始獲觀寓目霜威生恐怖
罡風颯颯滿座隅彷彿蛟龍起雲霧殺人血漑迹模糊
鏖戰沙場知幾度太阿倒授柄闕如豈是延陵曾挂墓
宵長往往風雨驚壁上誰令眞宰訴雄心未死肯沈埋
撫此直欲胸襟露

馬嵬驛

潼關一破烽火迫萬乘倉皇國門出六宮蹂雜戎馬間

日旰王孫飢未食借端誣叛擅行誅姦相無權死亂卒
明皇無奈且撫軍將軍徑請除君側紅羅三尺怨無情
斷送君王傾國色鬻拳兵諫由愛君詎等乘危忍相逼
古來女寵爲厲階脫簪待罪何人識日夜狐媚蠱君心
釀禍甯知危社稷豬龍亂實肇宮闈妖冶原難免誅殛
江山再造李郭勳扶危早賴將軍力不然河朔勢傾摧
禍本尙留誰討賊君不見景陽宮井相從匿身亡國滅
終奚益

昭君吟

漢家弭敵仗和親詔選後宮佳麗陳三千不少如花貌

悉屬丹青畫裏人按圖詎有芳容惜那意明珠偏暗擲
傳來楓陛拜君恩含睇無言情脈脈一顧驚人國色誇
翻令君王懊悔加環珮可憐歸朔漠已將胡語訴琵琶
回頭漢苑門重閉渺渺山河如隔世呼韓効順本可兒
想是溫柔解作堦寵遇居然位閼氏奚須漢節手中持
但教團扇無捐棄勝似長門怨別離妾容可毀心難毀
妾自心甘身萬里酬恩別有淚雙垂嗚咽一聲河滿子
邊庭爭戰日紛紛在昔徒聞苦六軍匈奴未滅嫖姚死
天遣甯胡妾立勲勲名絕代紅顏擅毳幕高寒夜時宴
深心還念漢宮秋禍水誰令縱飛燕五原欸塞日來朝

論功應首美人嬌麒麟閣上如圖像要起毛君筆再描

亡室四句忌日感賦

憶從初試踏槐黃懊惱歸來破鏡傷死別已成羈客恨
榮封還負夜臺望貧將楮鏹曾何補夢隔羅幃未忍忘
無壽翻爲冥壽祝癡情兒女痛親孃

中秋夕雨後見月

夜遊最愛中秋月纔到中秋興勃發招朋選勝競觥籌
處處杯盤紛檢列不愁座客清樽空但望城頭催日沒
黑雲一綫天際生俄頃彌漫掩天闕檐前急雷萬馬奔
滂沱勢似江河決天公作意阻狂歡頓覺豪懷成骨突

玉壺甯復可沾春賞雨翻令向秋節
更欲動天宇澄
萬里長空淨逾雪
人道嫦娥爲洗妝
我云好景先磨折

詠雁

大地關河濶長征爾亦愁
暫時同逆旅終古戰高秋
湘水蘆花岸衡陽估客舟
年年賓屈候果爲稻梁謀

旅舍秋雨

秋風吹老屋夜雨滴穿痕
一榻還移徙孤衾漸煖溫
鼠窺行篋動蛛罥古牆昏
寂處平生慣招尋嬾出門

作客未經旬蕭然寄此身
愁霖昏旦暮破壁勢嶙峋
巷

僻朋蹤阻居停鄉誼親

時寓同邑黃泰泉先生舊宅

論文有餘味樽

酒向何人

中秋前一夕偕阮獻南自省回鄉適鄉渡未泊借

宿澳門船

裝返佗城不歇年幾經江上共鷗眠
今宵月白風清候又結閒舟一夕緣

江湖無分寄浮漚蓬梗何曾逐遠流
祇有珠江一片月頻年同此話中秋

路經虎遜巖憶舊遊

惠有豐湖勝肇有星高奇垂髫聞其名
逾壯神空馳顧念總角交三五相羣嬉
曠懷期遠覽甯知境險夷即日

忻所遇攀陟幾忘疲矧茲靈異區肯令跬步遺巖高不
十丈丹艸絢神祠當門怪石蹲怒攫森猊獅繁蔭蔚嘉
木蒼翠紛交披朝煙散華葢夕雨含幽姿冷然僧磬聞
俛仰情自移世人苦局促境莫愜懷思眼前足會心適
意惟其時小樂即大觀何待洞天窺

哭家元梯掄

青雲同奮願偏違惆悵粉榆感落暉結社論文惟我共
亡家作達似君稀

君少家富遭變
中落不以介懷

熱腸終竟因人累往

迹何知避俗譏一事葢棺真未了熒熒弱息問誰依
明知麴蘖易傷生已歷滄桑命也輕事到艱難重向學

君因家變輟業越
數載復事詩書

身當壯盛忍埋名白頭有母情何慰

青眼無人氣久平誰謂儒巾終致誤一衿時命尙能爭

掩卷驚聞屬纊時魂隨風雨帳何之君沒時大風雨劇憐命短

才空賦翻憾名成數轉奇君補弟子員僅七載哭向窮途愁阮藉

彈餘流水失鍾期從今怕聽山陽笛樽酒何人可共持

蒿里聞歌意愴然况當搖落九秋天厄逢陽九皆前定

君於丙子九月起病今九月幾殆去病赴重泉尙少延君氣絕復甦轉

時許兩雁叫江頭悲此日鶴歸華表問何年殘書數卷留

兒讀篋裏遺文且待編

冬月夜起

養餘山房詩鈔

上册

二二

大馬站播文印刷場承印

天氣一冬晴披衣夜景清霧深窗欲溼月淡室偏明萬籟靜中滅孤懷事外生倦來還就枕輾轉數殘更

人日小雨獨酌

無事愛銜盃有興吾從衆壯顏助衰頹煖體敵寒凍平生不善飲壺觴時亦用但取意陶陶奚待良朋共天雨嬾出戶往來息迎送庭卉雖未花綠葉積陰重城市醉春節長夜恣酣弄持此謝俗情且可尋清夢

魚子橋

緣事偶山行無心選幽勝迤邐歷村落半屬羊腸徑險仄步難前時復逢泥濘田隴途堪循中虞水沒脛盤礴

足云疲相扶向誰倩小僮負囊隨力健步偏競履險直
如夷奔馳殆其性前鋒勢欲摧賴有此後勁行行復里
餘忽然開畫幃數家住山麓左右叢篁盛古木蔽長空
依山列石鐙一水向前橫清淺宜游泳有橋跨其上兩
石相排併酷類魚子形雨後色彌淨緣象命以名取義
亦頗稱居人雜耕販往來涉無病坐看蓑笠儔起土乘
春孟何意荒僻區倏爾增遊興歸途不再經雅懷殊未
罄會當炎夏時倚樹流泉聽可惜山無庵特欠一聲磬

即事感懷

人生有癖好夢寐恆遇之身既爲所累焉知神志疲靜

念亦良悔蟠結根莫移厥根緣何生伊戚本自詒豈無
千金方心病不可治安得大士瓶灑以楊柳枝

質性戒其偏君子慎所履苟假以姑容剝喪因之起既
剝豈無復浸淫恐未已譬彼毒蛇螫斷腕誰自矢矯制
足爲功操持仍莫恃盍觀明道翁見獵猶心喜

壽小明叔七十有一

我觀世人隨事任智術壽算獨莫敢持衡造化有定若
無定惟在斯人自全生尼山一語曰仁壽此語終古理
難更自來保身先養性形質始可完其貞飲食服餌世
所習秦皇漢武尤紛營詎知人與萬物原同腐安能假

以下長齡道家氣主丹田運呼吸自謂仙可成借形換
胎事雖幻足見老來血衰難與爭況屬人生苦憂患靡
同巖谷善藏形名韁利鎖牢相縛寸心膠擾無暫停稍
知妄念屏一切恬澹或復量非宏以云養生亦多術戒
彼戕伐據性靈保真詎必筋骸束千金之體要不輕大
抵順時節食資調攝境雖有累氣須平其餘日用酬應
歸簡畧宜以歌詠陶其情吾叔早年試場屋才氣跌宕
紛縱橫重以庭訓相敦勉力欲掇取科第書香承一時
交遊名下彥譚文講藝座常傾何圖坎壈志莫遂騷壇
聊復馳聲名甘蔗旁生多見折西河抱痛幾喪明緬茲

人事日蹙隘學道豈曰吾未能世情勘破付春夢遂闢
場圃課農耕瓜疇芋區親徧歷種植原不計餘贏興來
呼酒劇飲招田父詩篇百韻頃刻呈有時風雨閉門獨
靜坐吟哦聲徹野老常慣聽曰園地僻城市遠青山當
戶如列屏一水通舟僅逾丈時乘小艇收霜橙擘橙爲
杯就爾相傾倒醉後往往欲與鷗鷺盟借酒澆胸復何
有壘塊固已消層層所恨鄉閭少吟侶陽春白雪無人
賡詩成惟有自怡樂陶寫奚啻餌青精今年八旬剛肇
一春正忽爾微疴乘宿醒頗需藥物解調補無藉湯與
羹天遣湔淘詩腸兼酒膽或者小恙即屬期頤徵吾家

先代多壽考邑乘喬梓名同登

先九世祖
九世祖

東睦公年
雲籍公

年九十二並列
邑志耆老傳

從茲文苑別有傳要令并書耆舊追老

彭

讀謝皋羽西臺慟哭記

匡門日擊變山河牢落遺民一代多開督延平資策畫
招魂燕市動悲歌新朝寬詔收殘局孤憤餘生感逝波
寂寂西臺憑弔處空令血淚灑煙蘿

秋柳

濯濯丰神想舊時容消誰復問腰肢隋堤事去空流水
白下人來感鬢絲旂旒尙餘春色戀凋零徒見暮煙垂

天涯不少離情訴回首長亭夕照遺

西風吹到曲江頭憔悴何堪繫客舟
燕影掠殘春水岸雁行愁倚白蘋洲
靈和舊植誰曾識洛里新吟不再謳
料得故園風景異秋來王粲怕登樓

陌上遊蹤轉眼非
暱人情態尙依依
就荒陶令遺三徑
感涕桓公倏十圍
夢醒空閨人易老
歌殘金縷戍仍違
章臺走馬憑相憶
京兆風流此日稀

永豐坊裏歎無人
絮語誰同證夙因
有恨併歸羌笛韻
多情曾拂玉驄塵
梁園賦手思枚叔
金谷豪華感季倫
老大風懷殊未減
空令白傅獨傷神

鶴
并序

余鄉後山向無鶴前數年忽羣集於茂林之內鄉人申明禁約不許戕擊近復蕃育殆不止手千百矣每當風日晴明數十迴翔天半兒童拍手仰觀亦異事也

獸類喜羣聚失羣恆悲鳴禽鳥志高飛小大亦蕃生唯汝鶴性孤飲啄殊寡營無欲近有道白賁筮幽貞山林迹頗晦宜遠塵網撓世以此隱逸洵得氣之清我聞王子喬緱山夜吹笙一旦謝塵凡騎汝上玉京叔子自奇士意在揚汝名不舞羞對客知己何忘情或云丁令威幻化來蓬瀛華表不再見千載誰尋聲羽毛當自惜肯與鳩鵲爭朱門每羅致豢養汝何榮逋仙有舊廬嗣守

甯可輕光遊田野間獨行常嬛嬛胡忽集吾鄉千百巢
居成旦暮紛迴翔來往交從衡論者主地運氣王物斯
盈汝豈識盛衰預作休徵呈聚族汝何意翻令里人驚
盍亦返孤山重與梅花盟

曹操疑塚

賣履分香氣燄摧姦謀猶自護遺骸明知鐵錮終招掘
盍早貽人過墓哀

韓信釣臺

勝下人誰識丈夫眞王意氣至今無一竿若使沈淪老
畢竟英雄異狗屠

成都卜肆

百錢日足便安身
賣卜何須託隱淪
自是禍機能遠避
陋他投閣草元人

臨邛酒壚

窮肯文人犢袴穿
高題橋柱亦徒然
長門賦復千金賣
依舊生涯等市塵

枯樹

卉木有枯榮
茲理何足道
當其發榮時
顏色豈不好
培養固由人
運實關大造
得氣自張王
無復慮枯槁
岸然干青冥
孰與歲寒保
文士愛春華
富豔盛才藻
灼灼桃

李姿發洩每懼早睠懷松柏心獨覺幽貞抱

蠹花

花好勤愛護情當戒其甚冀漑苟過多質弱反難任日
暎鬱烈摧潦漬根復浸溼蒸生蝗蟲潛嚙七首沁譬彼
錦綳兒常在席與衽飽食猶慮饑肥甘忘毒鴆嬌養忽
垂危空自禳災祲此意誰不知當境固莫禁

詠史小詩

跛客何堪侮娛親反召兵平原懲一笑不敢愛傾城
間道歸和璧狼秦奈若何譎謀無足尙當取下廉頗
信陵赴急難宮內兵符竊失計聽侯嬴君臣義幾絕

奇貨邯鄲居著書何善賈千金懸國門博士羞爲伍
釜轆侯羹頡糠肥詬語聞並同邱嫂厭奇迹會風雲
酒令如軍令朱虛志何勇盟言白馬刑意在鋤非種
驂乘嚴威憚背如芒刺生幾人勳震主家尙保殊榮
不言溫室樹泐忍望塵拜當貴良薰心三公易其介
黨禍東京始和同苦共分太邱輕一弔名更重三君
寂寞峴山上猶存墮淚碑千秋何武治去後並懷思
慷慨中流誓從教猛著鞭新亭徒對泣何自畫凌煙
江左風流競夷吾治特誇西風塵縱污舉扇可無遮
不受青宮教逃刑賴直言國書緣謗禁誰識北朝尊

方罨衡天意英風凜座隅虬髯先氣沮何待局全輸
家事無須問忠言路遂塞咄哉田舍翁一語亡家國
三日賜洗兒此胡腹何有愛君貯赤心肯同金藏剖
易姓慣迎新勸進書頻草君國任推遷優游長樂老
帷幄君臣契鴻毛欣順遇澶淵擅奇功萬乘爲孤注
妻孥啖美珠不諫天書失責備本春秋已難逃直筆
休云一介輕蠹螫宜防慮謀國薄書生張元西夏去

哭門人李香谷

執業纔踰冠星終十二年

香谷於戊辰從余學逾斯人

偏數促遺迹賴文傳

香谷課藝本都

未遂終軍志疇知

倚相賢絳帷增感喟搔首向蒼天

比歲羊城學文名試輒優相期荒早破肯信命難留鯉

病驚前載

丁丑在
略血症幾

得

鵬程阻去秋

舊歲已
鄉閭備中

眇懷鄉

後起悽絕不勝愁

近年鄉中後進如
家元梯春臺俱沒

坐館苦熱寄友

星斗未換秋節序漸過夏涼風剛欲扇酷暑翻頻迓埋

頭理課牘勞難寸晷罷炎炎苦外鑠思澀語艱下嗟咄

亢陽愆鬱蒸被摧化愧乏內丹成靈胎養嬰姤邈想素

心人招尋共休暇論園富水木寢處崇臺榭茗瀹引巖

泉杖策憇僧舍曠懷適其天願言從高駕

雜壽詩

飲水當知源至道良足味
簞瓢不改樂未易顏淵喟
心超以靜迹象遺萬彙妙契匪言詮著述空辭費老氏
尚守雌沈默斯可貴深山有元豹澤霧常隱蔚

飛鳥畏投羅獸懼落深阱禍機伏於人智士有難鏡防
患在未然固知慎其行臨事過躊躇跬步亦爲病三思
始行父譏曾貽孔聖惟當避巖牆即此是知命

千金壁暗投匹夫或按劍豈以懷璧罪誠恐招禍陷人
情矜罕得異寶動忻豔蓄聚雖深藏徒遺寇盜斂賈禍
由璵璠破塚亦其驗胡爲象齒焚斯言竟罔念

布幅取其方寸尺有長短裁縫苟稱身非帛亦殊煖粲
粲文繡衣絲輕恆易斷匪唯塵垢污質難任濯澣外內
美須符樸素乃忠宣炫服彼何人機上紛組纂

忻戚亂中情營營劇非務所求一不當輒自詭平素脩
名有由立儒冠本無誤改絃失其操甯復破甑顧慨彼
北山移猶懷軒冕慕何怪三窟鑿覲顏爲狡兔

勇爵快先登誰甘居人後英雄論成敗意或關天授困
阨庸何傷途窮爲世詬憤激墮冥行因端致紕繆畧迹
豈難原古道泯忠厚壯心付牀第輕生尤大謬

初秋即事

空庭草綠影婆娑
偶愛行吟手自搓
嚮晚風微平徑竹
當秋雨甚敗池荷
隣逢歲歉炊煙少
人每愁生落日多
那更馮闌添遠思
寥天一鶴獨經過

先兄葬岡背村草芷園地送葬晚歸

寂寂秋原隱薄曛
四山遙望闇重雲
蟲鳴草際頻增咽
雁在天邊已斷羣
回首音容纔隔歲
傷心泥土倏成墳
路旁小屋燈光透
猶似當年夜讀勤

秋夜課讀

天意凝寒送晚陰
書堂漸覺氣蕭森
幔垂風裏青燈護
座繞書聲夜漏沈
問字半看逾總角
爨桐難定是清音

自慙蛾術功多歉
翻遣殘編費討尋

讀吳主政可讀遺疏

憂深嗣統事難陳
白矢微軀動紫宸
一死直將留鐵券
孤忠誰料出曹臣
光爭日月封章在
痛切橋山涕淚新
史筆他年昭論定
薊門風雨壯松筠

重陽前一日山行見桃樹已滿花

節候亂寒暄
物性常更變
季秋桃已華
即事驚稀見
山徑豁芳姿
爛漫枝頭徧
似助秋陽驕
故違東風扇
衰世重顏色
非時亦矜衒
媚人曷自芳
終恐遭厭賤
所賴深谷藏
相賞惟一
面我行逼
登高久罷
黃花宴覽
物本無

心詎爲紅顏戀况復戒履霜嚴寒將集霰繁華能幾時
過眼如郵傳何當載酒遊直入河陽縣

秋冷

沈沈天宇低仰視寒雲厚朔風吹鬢毛斜雨溼衣袖入
夕步中堂宵長起清漏展卷意先頽燈光闇如豆屋角
閃流螢瓦面落甍黽對此百感集坐聽簷前溜學子垂
頭睡經書苦句讀音義豈聲牙訓釋猶待覆舌本愧瀾
翻要自忘孤陋幾人擁皋比茲焉心不疚

高祖惺航公以叔泮 覃恩貤贈三品銜焚黃燕

集喜賦次小明叔韻

儒門世業隱蓬麻 天語初忻拜寵嘉在昔膠庠培玉

樹於今綸綍燦金花三傳職肇題戎節四代榮同慶朕
瓜漫說叔癡光祖德阿咸空喜學塗鴉

冬日龍山書院會文赴讌晚歸

終歲守臯比出門凡幾度偶緣文酒會披豁見情懷舊
交良覲艱醉談日已暮太陽沒虞淵倒射紅光露明霞
亘半空絢爛如火吐林木鬱蒼冥村舍渺迴顧因之悟
文境濃淡各自具邈然意象含悠悠與日遇遠觀誠有
得近取理宜務風過振微香梅花送歸路

再赴龍山書院文讌

有興還醉會論文已臘天抗顏增老醜妙手讓英年舉
世矜風氣從人笑雪顛一堂師友誼衣砵叙重傳

夜雨小齋閒詠

槐黃幾度戰秋風入世蛾眉苦未工最是書叢拋不得
夜窗還對一燈紅

老怕逢人說鬢絲舊遊如夢曷堪思分明一室維摩榻
坐破蒲團不暫離

自省往遊澳門在道阻風

縣南天開蠓鏡澳華夷雜處互居奇由明迄今數百載
四方逐利甘肥趨邇來風氣倍繁盛銀樓粉閣連棖櫺

我生疎拙嬾出戶勝境咫尺身仍羈穗城往返不知數
每從南望神空馳昨緣歸舟事中阻迂道倏欲遊波斯
江行濡滯歷三日帆迴楫息隨馮夸汪洋遠涉迹未慣
舵樓俯瞰殊險巖目極空江杳無際青山一髮何從窺
有客假我千里鏡縮地術類長房施輪船過眼瞥如電
波濤洶湧來無時虎門獅洋關天險巨礮屹立碣樓遺
烽煙靜掃龜窟窟戍守未敢關防離自古制敵雖握要
控禦猶難免喪師咸豐丁巳 祇今蕃舶爭輻關提督戰沒虎門內犯
輳連檣過此琛賫輟和戎歲久際清晏泛海奚用深憂
虞蠻帆出沒蛟宮靜坐看船尾張風旗晚涼片月臨孤

嶼浩浩萬頃碧玻璃

舟泊虎門

虎門雄踞倚南溟偶涉汪洋路此經天險粵疆資保障
時清王會肅來庭奔濤怒撼山形碧巨石浮空草色青
鯨窟久消烽火慮維舟一夕復占星

時彗星
見北方

望零丁洋

日落蒼梧海氣黃孤懸一島瞰洪荒東連大嶼開溟渤
西接橫琴界渺茫巨浪遠吞壕鏡澳驚濤直下虎門防
天南萬里來蕃舶羶慕奚容更畫疆

登澳門媽閣次石壁間韻

近覽風帆勝凌虛此構亭灣環潮不隔高下石俱靈水
湧樓居白山浮海岸青天然蠓鏡秀煙樹動蒼冥

七夕戲吟

銀河高迴會雙星瓜果家家列滿庭豈獨閨中宜乞巧
男兒拙亦仰娉婷

一水盈盈祇隔河相攜况有鵲橋過關山蕩子歸無日
少婦今宵恨獨多

年年一夕敍良緣好事人間未勝天守定舊情長不改
誰如何鼓誓心堅

睽隔雖然會面稀緣何別贈石支機河邊豈少乘槎客

空惹傍人說是非

聘錢終古未能償
錦織全憑擅七襄
巧婦洵堪家獨任
奈教鈍拙笑牛郎

輓彭紉秋

三載重相晤
翻成永訣期
人生真莫測
天道竟何知
事業中年盡
詩書後起持
一家增感舊
隔歲兩騎箕

去歲
彭祝

岡沒

辭館充鄉正
賢勞志辦公
長材籌待展
小試數仍窮
家事生奚託
庭帷養未終
百年泡幻境
始信釋門空

君繼
祝岡

爲鄉正僅一載
現皆有親在堂

閱宋遺民錄擇其名尤著者各紀以一絕

杖策軍門志已違猶懷忠義勗綸扉死生兩祭誄知己

千載高風助薜薇

王鼎翁

西臺痛哭獨招魂擊石惟看迸淚痕
晞髮自逃人世外

悲歌奚止戀微恩

謝皋羽

玉匣珠繻總作塵六陵遺迹未全湮
憑誰指點冬青樹

藏骨當年劇苦辛

唐玉潛

狂來潑墨寫幽蘭未死芳心忍共看
孤憤尙令何處洩

一腔熱血灑成丹

鄭所南

漠北追隨影未殂納餽大義激頑夫
向無燕市收遺骨

安得忠魂返故都

張毅父

金華遊歷擅清才放眼湖山亦可哀挂劍交情原自許

西風回首釣魚臺

方韶卿

賸水殘山局久終時平翻幸耳長聾劇談深夜何人共

零落知交涕淚中

吳子善

颶風行

長空一夕檄馳羽夜半千軍排牖戶園林策策人馬聲
臥聽天門擂大鼓凌晨起坐蒿日驚震撼轟然徹堂廡
枯蓬旋轉訝輪飛老樹顛狂作蛟舞濃陰疾捲布雲旗
激雨當空施勁弩昆陽大戰天爲昏地塌山崩降醜虜

三千鐵騎恣迴呼百萬貔貅矜奮武紛紛葉落滿庭隅
無殊委甲填江浦高竚建屋勢欲傾蓐食須臾潰環堵
端居猶自悸失魂况彼舟行在商賈禾麻菽麥盡損傷
安計辛勤農與圃牀頭穿漏突無煙貧家竈減難枚數
隣翁浙米欲爲炊愁顧溼薪那可取出門拾得頽垣甑
聊向破檐供葺補

庭桂

庭前有桂樹分栽纔尺寸花擔春市過沽來因價賤爲
易新瓦盆意憐質尙嫩姑置池沼邊用取灌漑便舊栽
桂數本張王色葱蒨眇茲弱小榦低顏羞與見秋至條

發榮形體漸改變一茁挺兩岐疾長逾竹箭亭亭看直
上儼似蓮莖健旁生皆暢達柔條殊婉變譬彼艸角童
未幾突而弁比視舊所栽幾難分最殿金粟綴枝黃不
待東風扇柯葉已改觀翻得主人眷移植使當階花香
被一院培深泥輒加清泉勤沃面風起防摧折愛護情
不倦行盼出簷間勢與屋瓴建對月影婆娑自賞恆歡
忭何圖淫雨漬溼蒸蚯蚓徧潛啣根偶傷葉墜紛紛片
權枿枝半枯颯然秋復戰遂令氣象更憔悴困英彥乃
知時旣失物亦難矜銜盛衰天道常浮榮奚足戀所貴
植根深雖枯究無悶餘馨未消歇仰企人猶羨吾道重

栽培鑒此當同勸

新秋

歲隔月重閏秋成天復清壯懷愁裏過涼意晚來生庭
桂尙留影池荷半折莖閉門雖未足隨分啜芹羹

秋夜對月懷阮獻南

風微鴻雁杳秋氣入空庭竹影涼篩月荷池淺浸星舊
情同逆旅倦眼對疎櫺卻話珠江景良宵檝正停

晚飯後獨坐小園

飽食明吾愧閒愁空復年逢秋還覓句待月且遲眠風
輕蜻蜓戲星低河漢懸世情易齟齬養拙亦欣然

晚小飲

一樽留客誚空囊善病年來遠醉鄉偶讀異書堪下酒
漫營兼味快浮觸菊花開後如相勸竹葉擎時倏欲狂
遣興自須隨興盡澆愁終恐惹愁長

夜大雨水過庭戶天明彌甚戲成長句

天瓢有意翻江河雷轟電掣龍擲梭沈沈簷際急奔溜
傾盆迨曉彌滂沱就中坑谷水已滿階下駭觀成旋渦
須臾浸淫達堂室跬步跼蹐如籠鵝往歲秋霖曾爲虐
積潦奔突門前過縱愁蹙蹙難舉足豈至汜濫生庭柯
孰意天公太作劇几席忽變蛟龍窩商羊舞罷河伯怒

石燕翔後鮫人歌寒儒偃蹇不出戶蕭條生計惟編摩
生平涸轍久坐守何乃挹注今宵多

中秋夜坐

庭前明月淨當戶風微冷棲鳥動樹枝難禁夜露警
竹密連樹陰漏無月半點獨坐向閒階房櫳且虛掩
室中各沈睡犬臥當牆陰誰知今夜月偏照獨醒吟
欲酌無杯酒意閒花自親露光蘭葉溼芳襲未眠人

遣愁行

愁來借酒澆酒酌愁愈煎詎緣酒兵憊其奈愁城堅愁
城倉卒不可破燈前似影隨行坐頽然一醉能幾何轉

眼醒來愁復過人生遇事輒有愁安能處處杯罍浮濁
者爲賢清者聖酒徒豈必皆罹憂將欲達觀屏一切冥
情強遏仍非計此愁未滅彼愁生雙眉緊縐惟凝睇我
聞稟性各因人西施方樂亦含顰天生愁種除不得貧
富貴賤情如一散遣非無良醞斟愁城一入終難出愁
難出奈愁何有意消愁愁復多君不見日月輪轉如拋
梭何人曾向愁裏歌嗚呼何人曾向愁裏歌

木芙蓉二十四韻

撮土儼成山麤材不擇地暢育有其機栽培無所事
彼東窗外徑長叢篁翠牆隅餘空隙泥土舊委積匪爲

花木儲原同糞草棄弱卉生其間挺然出不意初疑手
未植旋訝種何類葉大頗輪囷枝粗如指臂驟觀核桃
似細辨梧桐異不當蕪蔓除姑任勾萌遂濃陰覆丈尋
清光漏瑣碎月夜迫幽深花時尤雅致開落屆春秋容
妝變朝暮侵曉雪冠圍卓午霞裳媚旁交竹箭森面對
荷蕖恣古梅蔭其下幽蘭列其次小景增畫圖大造爲
佈置偶然競瑰奇倏爾成薈蔚多金購名葩沃土培佳
樹豔質易摧萎嘉植每顛顛雨露滋有時蒲盧敏莫逮
曷若粒種遺忽看繁蔭被枯朽蒸成菌糞壤產結穗美
哉木芙蓉搦管聊爲記

家顯亭招同屏之星樵遊花埭阻雨不果即晚飲

顯亭寓齋

旅次同遊幾盍簪名園有約恣幽探看花出郭逢秋暮
載酒登舟苦雨酣一日閒緣天亦妬百年勝地我先諳

壬戌曾隨
先兄往遊

相期茗芋消懷抱雅淡休令對菊慙

豹卿家園裏觀假山

身雖平地立神已洞天會一覽盡邱壑小中彌見大

讀史閒詠

篡亂全節艱因思逃於酒不忍見國危用意亦良厚參
軍性豁達智肯他人後韜晦麴蘖間遭時痛不偶荷鍤

死便埋視身竟何有頗怪徐景山沈湎供奔走自放詡
中聖道同志則否耽飲世並傳是非從誰剖陋哉高陽
徒原殊稽阮友

殷浩白面郎志大才不逮伏處爲名高甯知天下計一
出誤蒼生覆餗忝公器書空竟何爲咄咄猶慕勢夙擅
倉扁術醫原堪濟世舍此登廟廊反致聲名累造化巧
弄人顛倒失位置迂儒不自量妄意談經濟曷怪王荆
公新法徒貽弊

絲竹盛東山與人同憂樂澹然高世志矯矯雲中鶴謝
公含雅量未許兒輩覺大敵震當前笑談仍自若肥水

功卒成決勝憑一著從容受朝寄匪以縻高爵忠信事
見疑終難免謠詠幸賴桓野王彈箏善諷託雖未息流
言風雷可無作

彥回死中書便當爲名士賣國工求容甘自淪猥鄙鈞
是一家物何取以與彼篡竊久相因空勞奇貨市腰扇
障面羞人言安可弭乃知名行立志從富貴起患失旣
縈心狍狙難免此舜蹠界隱微奚待辨素履盍觀華子
魚趨利鋤金始

老少年花

卽雁來紅

少年人向花中老花色迎人更少年怪底花神長不死

鷄皮有術昔曾傳

薄命紅顏未是真此花端合號長春一冬占盡人間色
鶴髮還丹具夙因

葉葉花花總莫分祇應妬煞石榴裙深紅不籍東風力
老向芳叢冠一軍

歲除齋醮

羲輪無停轡冉冉催人老緊惟智與愚此身同枯槁嗟
予少蠢拙聞道愧不早踐歷憂患場中心怒如擣功名
矜逐鹿時復傷潦倒奔走疲道途坐歎勞人草壯歲廢
光陰及茲已華皓鉛刀莫適用一室隘懷抱攬鏡忽自

驚形喪恐難保願言懺佛祖請與除煩惱俗緣雖未淨
要使心常澡永息漢陰機甯街燕石寶翻然謝足別抱
璞遊炎皞濁酒一壺傾隨意事幽討譬諸隱谷蘭顏色
當逾好何待假年想默向蒼冥禱

哀流氓

并序

正月十二日有江右飢民男女約三二百人到
鄉向各富屋暨市肆強索錢米富屋多閉門拒
之翌日復至其勢洶洶鄉練代爲沿戶勸捐得
錢十數千與之始去感而有賦

宇內分疆嚴地界民生鄉井衣食賴時平族聚得鳩居
輕去其鄉人競怪流亡自古因荒歉餬口無資等乞勾
道途推解復何人橫索強要逾討債全家避地圖一飽

老弱扶攜共征邁間關數百踵相隨所至村落成都會
餓殍已分溝壑填暴橫甯計鄰邦害闖入門來據地坐
黨類喧闐儼蜂蟄薄給資斧償所欲主人再辭客未退
聲傳閭里各閉門有如寇至諄相戒天地生人容異視
歲功何苦區成敗人人困耗迫輸糧雖有兒女無處賣
跋山涉水願無家鼓譟不聞向公解比緣司牧束手多
往愬或防遭怒詈日惟倚索富肆錢良莠誰能別流派
何當長者賦哀鴻令我卻歎倉儲遺法壞

種菊

種樹足嘉蔭種花聊自娛菊本舊時栽開後存枯株留

待春發萌委置向牆隅月來不窺園葉吐根尙疎一雨
盡旁生歲稔盆面鋪煉泥卒未暇分種榦須扶入選判
佳色一一標名殊餘種植隙地混雜同荒蕪灌溉肯辭
勞編籬乏僮奴但令三徑存秋光滿庭除撫茲寸卉培
意便擬提壺重陽時不遠預繪招隱圖

春暮園居即事

長空新雨暗流水倏成渠花落憑欄後人歸上塚初梁
深惟撲燕市近不腥魚盎底糧休問空齋自有餘
月色平皋淡停雲帶晚天筍抽穿徑長荷貼漾波圓雨
過池萍散窻虛壁薜延閉門幽意足待暖汲新泉

高樹流輝麗晨光正辨晴畦蔬新入饌山鳥自呼名睡
起空庭豁閒居意境清此身成老懶兒輩尙書聲

冬至日表姪王湛泉姪倩周蔚雲過敍因留小酌
甕裏新醅歲甫週家常客坐少勾留偶緣親串過從熟
恰值佳辰欸洽投烝祭餽餘嗤薄味天寒酒力抵重裘
文章謬被推先輩慙對英才已白頭

解館讌別

黃柑白酒喜開筵判袂光陰又一年汲古共憐風雨夜
懷人不隔水雲天情深梓里時相過醉憶蒲觴景尙懸
轉瞬春明重聚首青燈有味故依然

耳病日劇戲作解嘲

仲車獨行士篤學善養親王父雅能詩高詠自全真更有吳思齊國亡志隱淪三子皆病聾旣沒名不湮畫地容可語指諭代舌陳今我百無長碌碌等齊民旣深愧孝子亦復非詩人遭世矧聖明無病詎吟呻胡然瞶兩耳曠代與爲隣面壁常不言交接廢主賓學道苦無得末由悟前因社酒雖有饋酌竟徒沾脣懸知人事乖未敢頽其身寓形逆旅中過眼祇微塵何戀復何懼大

造任陶鈞

閱天水冰山錄

宰相青詞寵擅名
獬兒怙勢恣橫行
也知楊沈冤原濫
終讓徐林計暗成
藏賄祇爲天府守
逃刑空寄墓廬生
胡椒百斛歸何用
鹽政徒私鄢懋卿

閱碧血錄

太阿柄倒授刑餘
兇燄薰天國運除
正士視同機上肉
忠臣併作釜中魚
沈冤已盡千般法
坑命惟憑一紙書
牢戶屍填元氣索
坐令宗社漸邱墟

哭三弟鳳翮

謀生無路賦閒居
抑鬱窮愁十載餘
抱病經年稀藥餌
因貧幼子廢詩書
產分先業纔沾潤
債負平生漸罄儲

寢疾彌留知不起痛深一暝歲剛除

新年爆竹正聲催強慰慈幃未敢哀
柏酒竟虛元日醉
藜羹難免室人猜相攸得壻初諧願
遺痛憐兒尙屬孩
最是家門偏苦我嚴親知否訊泉臺

上元夜步月

客歲耕種連荒歉新正閉戶各早眠
猶憶昔歲上元節
梨園劇演鬧管絃屠蘇醉後街鼓動
社壇處處花燈懸
村中謹呼夜不絕是時月色暗平川
宿雨未消泥潦漬
踐踏頻聞聲濺濺今年開春晴無雨
一輪皓月空雲煙
三山照耀金銀闕快遊直欲招羣仙
褰衣獨步苦岑寂

呼兒隨侍出門前擬尋朋舊愜清賞攜壺共酌恣流連
行行但見燈火息冷淡翻如掃雪天乘興到門興已盡
剝啄奚事驚吾賢掉頭返步歸家睡撫枕不寐思其然
乃悟樂事不在景不樂祇爲囊無錢吁嗟鄉閭幾遊樂
年年辛苦勤耕作行看春雨又扶犁歲晚田禾忻載穫
但願家家滿蓋藏來春爆竹聽煌煌

夏至日偕鳳朝雲裳由省搭輪船過香港遊博物
館

我昔遊澳門頗駭風濤險恰值舟行遲方輿得并覽遠
見輪船過瞥如電光閃巨浪濶無邊極目羣山掩幸偕

有鄉導一一憑指點茲焉路再經浩蕩豁心膽橫臥乘
天風波平煙靄歛賞眺恣中流蒼翠落筦簞欲認舊峯
巒翻嫌日荏苒加以一舸疾轉瞬失荒嶮抵岸已迨晡
短至景初減三宿窮夷居探奇識琬琰

夏日舟行

漁艇垂楊到處同許多蘆葦亂篙篷不緣海濶風濤險

那識天河別路通

日前遭颶風舟人
改由河內取道

人煙江岸遠全稀傍午潮痕欲上磯倦倚篷窗閒眺望

桑田萬頃一鷗飛

半日江行百里程櫓搖篷背不停聲頻穿曲港如旋磨

孤塢前頭送復迎

夕陽林際暮鴉翻
隱隱樓臺隔水堦
鎮日山明開罨畫
不須惆悵辨江村

早寒

寂寂燈相對蕭蕭寒
白侵涼風催漏永
小雨變秋深疎
嬾成長疾窮愁耐
苦吟殘年衣食迫
世事不縈心

久不與龍山書院文會偶作一首爲山長胡君仲

薇激賞戲成長句示湛泉

兔園學業半荒蕪
白笑冬烘膽氣麤
直欲少年裙屐競
不甘後起馬牛呼
埋塵豈敢重彈鋏
縱轡那知尙識途

濁酒從今休潦倒且將花樣混時趨

漫興

飲罷屠蘇一放歌醉眠窻下意婆娑當春梅杏精神見
習靜家園嬾慢多老我半生惟握管聞今絕徼正橫戈
自慚於世全無用徒切憂時喚奈何

時與法國
相構用兵

論詩示兒

作詩句未工不必過求鍊祇憑意境造邱壑胸中見天
機時感觸妙喻乃稱善世途多索瘢据撫名流徧璞玉
有時藏荆山曾泣卞淺語亦何傷鄙俚固當變詩本緣
情性不同如其面風氣尙豔麗於時更相煽猥褻涉閨

房雖工毋留眄慎勿汨性靈蹈此名反賤相期破萬卷
譬若供穀簋珍蔬可兼陳一一須下咽吞吐用我法觸
處隨其便領畧貴無言落花深一院

春曉即事

睡起清閒自整巾晴光旖旎劇宜人窗蠅彈翼知將暖
檐鵲營巢占早春近市兒曹便具饌行廚老嫗正求薪
寢門慚乏鷄豚供怪得庭無墊角賓

寄顯亭

蘧廬風雨寂無懽兩地相思總一般春柳正當青眼拂
蒼松甯異素心看君今歲應得貢然時憂邊微深烽火

會見高秋振羽翰獨有兔園株守客祇同貢禹切彈冠

哭家曉山貳尹

總角論文憶比肩名場屢阻祖生鞭優游生計嘗饒蓄

慷慨豪交誤失賢

君嘗蓄有二千餘金因與許某交喪其貲

勵志都門仍白

帽

君曾一應京兆試

投身宦海罷青氈百年幻境真如夢回首

臨風一惘然

同儕多藝素相推妙解琴音奧已窺曾向閨中傳蔡琰

君熟諳琴韻一授之頗聰慧嘗傳授之女

偏難世上覓鍾期清風未擬懸魚頌

遺調空留落雁思

君素喜彈雁落平沙調

一曲雍門誰下淚繡帷

瞻拜寫哀詞

遭亂荒園草自芟閒居惟日事長鑱

咸豐丁巳英人入城罷試君與令叔

豹卿暨康君海珊於家園種植花木因約聯吟社

藏鬪花底同拈句賭酒窗前

笑立監百里喜君叨紫綬廿年慚我尚青衫

君援例報捐縣丞

新塘舊侶如雲散阮籍難禁哭阿咸

再赴西江服闋餘頻年沈滯阻音書

君丁外艱起復再赴西江愁看

僕馬增羸敝苦向轅門聽誥除身健拚教長作客遇艱

終竟等窮居淒涼薄宦天涯隔一暝應難憾遽攄

穗城促膝話行旌握別曾同對短檠

乙亥同寓羊城過君館送行劇談至

夜十載睽違成永訣一春惆悵念交情

二月十三日忽聞君訃

那堪壯志埋長夜竟令浮名悞此生桃葉昔隨江上去

孤栖渡口尙須迎

庭前雁序立森森羣斷關山已渺音衣線反添慈母淚

君昆仲九人嫡庶母尙在堂

鏡臺莫慰室人心

君室素賢教訓諸子業有成立

夕陽

此後空聞笛流水他時孰鼓琴旅櫬迢迢還故里鄉閭

哀奠想情深

殉節吟

爲家曉山側室黃氏作

東風忽變西風咽黯黯春歸正愁絕瓊花吹散瘁遺枝
轉盼兼旬復挫折囊金蓄得買蛾眉挈伴西江作宦時
壯年夫壻拋家室妾侍須隨永不離需次十年艱苦共
一官羈滯窮難送方圖鳳詔與分榮那知富貴成春夢

孤燈旅夜劇淒然病榻長陪藥屢煎自願今生同白首
管教貧累賣釵鈿仕途蹭蹬人無壽大息轅門空守候
到頭一暝痛分飛哭奠晨昏推抱柩誓思隨主赴泉臺
魂逐長江日幾回千里迢迢扶旅櫬強留弱質共歸來
歸來泣說津門事曾效僑妝充僕使關間風雪冒嚴寒

主病從茲增喘氣

曉山舊有喘疾在西江時因事往天津令氏改妝作僕隨侍歸後疾發遂

至劇

思前想後總吞聲回首潯陽淚暗傾幽魂知否曾同

返腸斷中宵念舊情恩情難斷生奚惜渺渺重泉尋服
役拚將一死殉癡心竟把黃金鑄胸臆霎時天地爲含
愁節烈行看志乘搜明珠十斛同無負佳話重編燕子

樓

南陽懷古

臥龍岡上起英賢
籌筆猶傳古驛邊
出處獨高莘野後
經綸默裕草廬先
三分局創天心變
五丈星沈國步遷
帝蜀至今存正統
千秋火井見重然

湘江懷古

讒張何至竟無名
自殞沈淵命也輕
騷怨一篇詞客祖
幽魂千古楚纍貞
不留芳塚題忠表
惟恨秦關挾詐盟
怪底吳江英烈著
胥濤長覺怒難平

次韻瓊峯賀五十一壽

人生百歲五十半百歲人生不易觀我年五十已逾一
大衍數復從頭數憶昔奮志爲文章謂可登壇奪旗鼓
蹉跎場屋空復年反讓成名與賈豎淮陰失勢意無聊
徒作大言羞噲伍賦命何知薄且奇才思猶思展眉宇
吾兄弟序符馬常不幸伯良先歸土雁行折翼叔繼逝
棣萼惟存四與五以吾一日長稱兄督過恆寬過或怙
慈幃耄祇愛兒孫罔慮爲非辱宗祖子由素共業巾箱
家計書香力尙努何期坎壈亦同遭虛名浪挂圖書府
豪氣消磨過四十倚柱長歌劍猶撫男兒不遇可憐蟲
婦孺無知或加侮科名分定難強求身世要令畧有補

忠孝由來在立心何嫌鄉里安椎魯雖無剛膽荷時艱
肯效鄙夫甘媚嫵閒居天旣與優游俯仰乾坤恣所取
營營境若役其心詠月吟風亦徒苦所憾抱病常閉門
座少朋交傾肺腑兒曹強欲與爲懽綵戲爛斑作萊舞
詩腸酒膽興復騰總使俗氛不著肚遨遊五岳縱未能
頭巾豈被人嘲腐况復家有小園池蒔花栽竹兼爲圃
陶然自可樂天真苟政幸無猛於虎立功立德須何時
暫令一醉忘今古醒來勤自課兒書暇餘並及農桑譜
家雖累葉著儒巾耕讀何妨子異父但能飽煖志無荒
愚智均爲保家主身榮業裕壽且康謹法昔賢顧門戶

獨立池上

日暖扇和風竹梢微弄影
瑩然花木光寂寂春暉永
一鳥在枝頭不鳴意若領
相對亦忘懷彌覺天機靜

夏至大水傷稼

比歲遭凶歉田疇少人耕
十室九困窮倉廩無餘贏
懸知人力殫尙冀一收成
倍獲升斗沾庶免涸鮒烹
稱貸可再謀命運拚與爭
今年蒔插好開春風雨平
良苗被原野芄芃兆豐盈
老農互相慰甯慮復呼庚
咄哉夏五屆妬占陰始生
行潦忽盛漲浸徧畝縱橫
滔天來無涯勢似江河傾
千金築高堤翻與澤國并
穰稔全汨沒漂

蕩鮮遺莖窮檐亦何辜粒食愈艱營呼天旣莫救惟聞
愁歎聲

九月秋闈復報罷

讀書祇求名計拙志偏左平生事科舉到老仍故我坐
廢苦長貧潦倒無一可汲古豈不力胡然致坎坷覓食
思出門已如舟無舵刻楮圖再振衰頽恐不果文章旣
失時夜復惜膏火何當逍遙遊快脫韁與鎖

冬夜讀史偶作

鄧禹望文學馬武冀督郵自待不嫌卑尙恐志難酬豈
料風雲會終至公與侯人心苦不足榮達多所求一朝

被寵遇張帆不復收位高奚足恃失勢或累囚與其覆
餗譏曷若解組遊所以古哲人勇退在急流仕甫三百
石林下簪早投雖無鐘鼎銘亦免軒冕羞

望月

眼倦罷觀書燈暗殘膏歇虛室夜生白起弄霜天月皎
皎正當中頓覺胸明徹雖非了禪悟意自無生滅冥然
遊太空今古渺一瞥仰視畧徘徊微雲忽點綴

次韻少明叔絕糧紀事

著述老空山境易遭貧餓天旣予賢智處窮原無奈伊
惟道力堅世情早勘破營營博一飽反似蟻旋磨人生

困阨無奇傑何由作垂耄櫻此况長日本難過簞豆或
見憐嗟來肯甘慙撈腸書萬卷陳疇昧食貨一任饑火
燒要覺肚皮大閒居慕淵明乞食詩堪和賜戴忘設箸
怏怏罪卒坐銅山滿鑄錢死時無一个富貴忽餓夫奚
獨士輒軻猿狙善攫食穢迹人所唾貧乃致盛名失火
何妨賀黃齏有餘味休令銳志挫窮老益堅壯書紳力
敢情糠粃尚可肥令聞足昭播渭水昔垂綸八十爲王
佐巧婦雖莫炊讀書良未左漫學槁項兒擁被蒙頭臥

冬日即事自遣

荏苒歲除迫荒村草木摧禦寒聊貰酒避債竟無臺海

國消烽堠田功罷土萊何人均賦役軍餉尙頻催

遣閒憑筆硯寂寞亦何堪久困名心息勞生世味諳夕

陽庭外樹疎磬舍傍庵閉戶思脩省悠然物理參

晚稻傷霖潦收成比較遲冬蒸循舊俗雪粒試新炊雀

啄寒蟲墮雞爭道穗遺隣居薪欲備禾藁拾童兒

空庭逢短晷夕膳每逾昏燈火貧家惜經書穉子溫曠

時防輟業愛日慄懷恩稍喜含飴慰攜同問寢門

安懶功全棄謀生拙復艱長貧愁歲歉多病愛身閒臘

近梅花吐囊空竹葉慳蕭條朋舊隔展卷一寬顏

雲裳餉藥酒壹罇試飲

我生善病膽每怯縱飲未敢顏常酖邇來筋力就頹憊
靜養亦復時違和牀頭糟邱屏勿用閒惟弄筆恣吟哦
有時枯坐意蹇澀聊以一醺招詩魔酒兵雖弱愁城破
句拙遑顧人嘲呵自吟自賞等敝帚羸然心血坐消磨
檢方正爾思調攝珍藥莫致奈貧何今晨阿咸忽有饋
舉杯便欲平宿疴天寒瑟縮藉撐柱乘興兼助巴人歌
醉翁意本不在酒再爵言言甯取多

園居漫興

小園風物正淒清開盡梅花暖復晴霜竹漸凋經雨活
水池將涸見魚行蟄蟲墜戶時還出凍雀飛檐未作聲

淡漠自堪娛老境不緣遲暮感愁情

抱病年來已忘憂夢醒周易在牀頭無才遺世難言隱
獨學驕人易召尤剝啄未容交友絕蕭閒堪與野僧遊
濁醪一酌無餘事坐看斜陽淡影收

醉中遣興

冉冉雲陰日薄消寒窗獨酌興偏饒弄晴牆角來雙蝶
傍暖簷前臥一貓臘盡野梅香欲斷霜輕側柏葉微凋
平生不作章臺客買醉何須脫錦貂

饑鳥行

并序

客歲因病失館窘匱彌甚擬覓回一館稍資津貼竟不可得歲底負欠纍纍偶見一鳥飛鳴簷

際感而賦此

寒風獵獵西北隅草木黃落霜天枯簷前饑鳥欲下啄
就中有客長嗟吁連年水潦禾淹沒瘠田隨處多荒蕪
穀米歉收債負急飯粒何從遺汝舖兵戈甫息邊儲竭
里閭況苦重捐需一家俯仰愁難給縣裏昨又下官符
敝裘典後尙未贖拮据稱貸且完租我聞烏汝能反哺
將毋有母餓頻呼天寒覓食不易得往來困憊仍守株
嗚呼我亦困憊仍守株歲除已迫囂盜罄寢門缺養愧
汝烏

先君諱日感賦

冉冉歲除日悠悠永隔天椎牛經幾臘馬鬣又三年辛
苦杯棬念艱難產業捐趨庭懷曩昔風樹一悽然

寒夜獨坐懷顯亭

時方選貢

寂歷流光暮離愁入客醺寒天餘臘日細雨溼江雲蔣
徑勞移屐佗城憶論文飛騰當在望音信阻相聞

歌風臺

故人高會樂言旋人去臺空萬古傳泗上爭誇亭長貴
沛中誰道漢王賢懷鄉此去仍遊子擊筑今來豈少年
誅戮功臣思猛士風雲作合亦徒然

蕪婁亭

滹沱水合識天心一飯荒亭自古今赤帝合當炎祚續
真人甯爲險途沈雄飛洛水符陳寶龍戰中原息漢陰
星宿搜羅羣翊運識文翻遣誤劉歆

見先兄遺詩感作

詩僅存壹
百零三首

鵠原愁隔觀遺篇回首高歌廿載前好客豪懷傾北海

憤時壯志指南天

丁巳英人
著有羊城雜感十章

寥寥佳什還藏

篋落落文名待表阡一自隨同椿樹隕萱帷寂侍我淒

然

先君棄世逾
月兄繼捐館

復館孝烈祠夏日苦熱

荒祠枕山麓榕陰覆蘚瓦室多頗完繕堂窄難旋馬節

烈前代旌俎豆昭廡庠門坊尙屹立遺範欽大雅湫隘
近市塵幽靜如郊野創構溯昔人更迭有居者家貧學
無所少日館常假忽忽二十年嘯歌不暫捨耳瞶藉養
疴閉戶交遊寡寂寥無與懽日惟蟬卷把讀易筮得朋
砥礪相陶冶偶來二三子盍簪喜同社衡文定甲乙夜
輒至燈炮拙匠乏引繩場師空養櫝講論忝臯比面赧
容如赭新篇恣批評丹黃憑妄下詞源擬屈宋文筆摹
董賈朝夕幾忘疲春徂倏及夏蠅蚋苦紛營鬱蒸易沾
惹枯坐汗浹背有似甕中鮓秋風時未扇誰爲營廣廈
呼童汲山泉煎茶兼掃灑安得萬柄荷對雨同傾瀉

端午雨後

急雨炎氛掃天青捲暮雲人閒佳節過館靜市聲聞老
覺多貧累愁難倚酒醺塵襟看蕩滌獨坐罷論文

水漲

淺渚依村舍通江入急流岸隨青草沒門帶碧波浮客
歲傷全浸農家望早收未知西潦盛恐此復遺憂

仲夏風雨遣悶

長夏劇如秋天氣轉寒凍斜風細細飄疎雨沈沈送炎
曦時早駐裘葛互更用偶爾節序詭似緣積陰重嶺嶠
地本偏勿怪天夢夢抱悶坐空齋爲懽無與共忽憶少

壯日朋儕欣過從冬寒夜未休歌呼雜嘲諷雨雪雖在途衝泥等馳鞚老倦迫人事索居苦倥傯性惟耽便適閒親花草弄小構有園池俯仰隨目縱妻勤衣破補兒懶書課誦沽酒乏囊錢吟詩作清供

晚坐小園

雨過荷花香正當溽暑節涼風起竹樹夕陽倏已滅天碧帶晚晴雲峯幻奇譎三五燕飛翔勢似爭頡頏一鶴橫空來翛然姿態別轉瞬蹤冥冥遙望眼生縵方池失明鏡悵恨浮萍綴微徑傍牆陰所在崇蟻垤負運亦良艱小大猶行列俯仰物情適觸目皆可悅獨怪草根蟲

秋至便嗚咽

丙戌生日羊城寓樓作

作客佗城例閱秋每逢初度此淹留雲山入目諳全熟
場屋埋頭老未休望隔慈烏晨夕曠慙同征雁稻粱謀
連年逆旅多卑處今日西風一倚樓

小明叔分贈墨蘭一種

蘭爲王者香何緣在空谷高人偶提挈種比籃田玉衆
卉豈不芳守黑憐此獨譬若幽隱士閤然異其族天寒
雪不凋雅契同梅竹吾齋多植蘭盆列三十六春夏紛
吐葩一色無殊目自笑九畹滋徒泥離騷讀今忽獲異

種高標擅奇服幽靜愜所好且以祛塵俗

道經聚龍菴見門外駐紮團練

嚴行詰盜盜轉多嘯聚千百誰奈何連宵劫掠莫能戢
告官祇見官揮呵鄉村僻遠乏援救各自樹柵傍山阿
練籌犒賞良不易合團挹注需江河昔人遺舉重防務
賴有儲產供張羅遴選丁壯備護衛餘力且可窮奸窩
時當野外秋成斂守望尤要在田禾比年水潦今歲稔

抽收新例毋嫌苛

時因防務
按畝抽捐

初冬漫興

寒氣重陰積寥天雁影沉存亡增感舊閱歷任違心老

去交情淡愁多雪鬢侵惟餘短檠在相伴到更深
晚稻人欣稔秋成屬比鄰自嗤窮筆硯稍喜易芻薪在
弱憐嬌女寬閒慰老親也知生計拙一飽未嫌貧

久旱多枯竹微寒始動梅葉乾稀霧露室淺坐塵埃樸
拙容稱老疎狂肯任頽評文疲課牘累月罷銜盃

空村寒日落冉冉歲將除潦降魚兒竭風狂木葉疎閉
門時種菜不寐且觀書莫問明朝事糧賒盜有餘

元旦雨作雷電交至時旬日後方立春旅館醉餘

率筆漫賦

歲除街柝初沉寂市廛燈火未休息寒深客子擁衾眠

漏盡醒來逢霹靂初訝電光樓外閃旋聽雨溜簷前滴
瀟瀟幾陣響空階轟然一聲天乍白展衾欲起怯寒風
瞢騰復入睡鄉中禡祭店間喧爆竹高燒蠟炬徹窗紅
圍爐促膝同懽樂斗酒隻鷄隣伴約椒盆獻後事撈蒲
碗大蔴團恣饞嚼新年利市兆喜占贏錢競欲盈腰橐
投刺敲門賀歲頻主人翻嫌客剝啄我時寓居苦無友
起坐呼僮且煖酒梅花豔放似迎人相對儘堪愁思剖
唯疑節候未回春雷奮春先驚罕有

迎春

藉田遺令重農功守牧官殊治課同郭外酒旗分柳綠

衙前綵仗趁花紅
土滋霰霖膏全動
雷奮郊壇氣早通
此日一犁忻兆歲
羣瞻馬首樂融融

館齋閒詠

陰晴難定晚來天
半臂輕寒尙裏綿
冉冉雲容浮落日
疎疎雨點亂炊煙
苔階綠淨曾誰唾
茶鼎香清每自煎
旖旎翻增情意倦
不堪閒廢度長年

孤館無人寂亦佳
叢殘堆裏過生涯
鳥衝細雨簷前去
葉帶幽香瓦面埋
晝倦豚兒常伏案
春深蟻子乍緣階
臨池疎懶成長拙
書法從誰論折釵

素琴絃斷久無音
獨坐虛堂暝色深
清夢祇堪同蛺蝶

舊交終乏慰苔岑歸鴻目送天涯隔語燕新來故壘尋
滿徑蓬蒿看又長蕭條門外屐痕侵

悟到鳶魚化可窺雕蟲應愧壯夫爲文章有福甯憎達
學問無源易負知寂寂落花依小圃陰陰垂柳裊輕絲
繁華已過休深惜還有幽芳屬後時

春風澹澹扇微和座憶朋交少日多老矣杜門因病懶
晚而重學惜時過論文此後無投轄問字差堪共訂訛
虛擬園林圖自適一編遑復事搜羅

清明

寒消百五倏清明徙倚閒看節物更晝汲山泉頻瀹茗

晨添薪火便炊錫牛窗旭日花陰重一桁春風鳥語輕
天氣熟梅人上塚兒童隔壁靜書聲

小園內杏花初開

一春何事費東風雜卉依牆自作叢繞逕漸鋪芳草碧
隔窻忽放杏花紅竹梢低亞晴煙豁池水光涵暖日融
浸向隣家誇及第且看消息起田功

輓族子心穀

梓里論交歎逝皆中年哀樂總傷懷釣遊往迹情可隔
生死窮途志竟乖半載筆耕依練局兩番絃斷悵遺釵
追思虎遜巖前話匣劍青山久自埋

君寓居虎遜巖內乙酉
閏後往遊晤君曾留和

壁上詩
二首

雨後偶步園外

近山煙樹暝雨後散空濛
野水魚塘滿芹泥燕壘融
籬疎花自補牆缺路還通
忽覺塵襟豁悠然向晚風

送表姪王堪泉啟綸往外國日本教讀

男兒旣壯不出門
跼蹐焉知天地大
邈想昔人事遠遊
每假山川發雄槩
奮然結束萬里裝
足迹時窮九州外
誰歟鬱鬱居鄉閭
坐戀妻孥守織芥
後生英俊數王郎
逾冠掇芹氣超邁
酒酣拔劍旁無人
連戰文壇馳玉軌
晨來過我忽告别
道遊日本揚征旆
才譽居然達海邦

推轂友朋同沈瀝我思日本即東倭勝國屢爲邊境害
自從海舶互市通雄視諸蕃拓疆界邇來中土多著居
富商巨賈饒珍貝王子茲行既有合賞鑒定愜襟期快
縱談文藝擁皋比浩浩波流別千派蛟宮螭闕紛胸羅
濡毫點竄皆珠琲豈止鷄林競傳播還看鶚薦乘時會
從茲騰達宦京畿奉使夷廷耀冠帶火輪此日指扶桑
奚畏馮夷舞澎湃他時天際覩歸舟鼓柁應思重訪戴

晨起即景

晴天一碧了無雲喜鵲簷前噪曉曛風定落花春欲去
香沈起篆鼎初焚魚鰕市滿知潮盛隴畝秧抽趁暖分

最愛斜飛雙燕影尤工取勢掠波紋

蜘蛛

祠荒壁角昏隨處蛛結網大小形各殊孰能窮其黨絲
長乙乙抽當戶類織紡渾如走旋磨團成太極象高踞
冪空階規佔一何廣佈勢握中權機深伏魍魎宵晝蠅
蚋聚乘氣紛下上擾擾倏自投見陷真屈枉遊蜂偶巡
簷被絆悲鳴響張翅來蜻蜓宵得兒拘禳一切藐衆生
掩殺供食享濟惡予爪多天復助雄長弱肉本強食奚
識關痛癢有時風雨至匿莫知所往迨昏戶低懸出入
妨額顙破屋門無薦例假作虛幌暑夜苦炎蒸檐下坐

迎爽緣頂似釣垂陡驚亂懷想臭穢毒於蚊不堪捫以
掌佳人喜藏榼卜巧恆自廷吐繭放圓光歲久大逾蟬
結繩古取法論智足稱賞豎儒乏才思腹儉仍登榜咄
爾滿經綸逞此小伎倆

山行道中避雨

瓜疇高下衍陂陀豆莢青青間種多山色晦冥迷遠近
黃泥阪上雨中過

蹊徑崎嶇舊熟經遠山入望似圍屏饒他幾陣黃梅雨
危坐肩輿樹下停

展 先君墓幼孫鎔光隨同行禮

近展松楸路衰頽步履艱不辭岡阜陟尙忍淚痕潛祿
養終慚負親年孰可攀扶攜憐弱穉望望祇空山

黑蛱蝶

色界生來別有天託身香國許前緣羞同青鳥隨王母
悟破元關作散仙遊戲具徵三昧足輕狂生怕一時傳
漆園夢裏原非幻好傍妝臺翠黛眠

尋芳時已近黃昏倚檻空憐倩女魂垓下虞兮宜有墨
泥中詩婢太無恩龍賓入幕誇尊寵眉史修容擅婉溫
料得滕王工寫照松煙著紙了無痕

栩栩丰神弄晚窗瑤臺有影恰成雙林深化去迷支鵲

月黑潛來感吠旄倚翠偎紅超色相淡雲微雨怯衝撞
遊蹤倘話羅浮約燼落空懷對夜缸

擬從香火問前因金粉飄零閱幾塵入世無如甘守黑
涅緇誰信復全真不教愁恨縈青鬢卻任翩跹逞黛顰
滿院濃陰難覓影倦眠花底愛橫陳

書張益州遺事

先生自號取乖崖褊性當真未易諧怒擲冠纓湯碗上
逐蠅今信有同儕

俠骨天生迥不侔代除狼僕儼同仇更難寢榻裙釵侍
十載依然白璧留

虎遜巖

寂寂空巖草木春
僧來何處問原因
當門怪石蹲猶虎
不信冥頑肯讓人

芳村古蹟盛傳聞
碑誌難尋化暴文
借使生公仍說法
巖中舊事亦煙雲

蒲節前一晚與幼輩池上納涼剝新蓮子共食

園小乏果木楊桃祇其一
外有核桃樹實比桃彷彿週
歲纍纍垂皮厚肉在核狼藉落園地
味澀棄不惜美蔭
劇高張未忍斧斤伐
每當炎夏間倒映池水碧
池蓮一派開香氣常入室
清賞逾十載花葉倏
彫瘠潢汙暗引

注稼濁藕種失池面漲浮萍重疊無纖隙客歲得新荷
復恐生機窒不嫌抱甕灌姑置盆盎屈花少不數莖嫣
紅好顏色今夏早吐葩仙子霞裳出亭亭俯衆綠鮮妍
耀初日愛護等瓊枝相戒剪伐勿花落子滿房兼旬熟
可食池上晚共坐涼風動人髮偶話設蒲觴盤飧苦無
物因剝語幼穉且餉家丞實

香蓮寺雙古松歌

我聞鐵城之東蓮峯側其地舊有雙古松此松不知閱
幾代因松建寺恰當山之衝寺常有興廢松惟階下挺
相對干霄拔起蔭蓮堂乍見疑是護法神金剛有時風

雨冥晦闇立若奇鬼又疑參謁來魔王虬枝糾結垂擔
外晴空細細吹笙簧仙籟慣教老僧聽孤磬一聲禪入
定鶴未來雲亦淨並立千年存質性質不任斧斤伐性
不畏霜雪病根埋泉井歲久已化爲茯苓其上倒纏榕
根開畫幃噫古來材豈乏樑棟巖壑深藏不見用與其
沒空山甯向佛清供今旣同依不二門遊客摩挲倍珍
重但使柯葉無改天地與長春奚須攷古更問誰人種

暑夜白遣

倦枕人無睡臨階河漢澄漏聲催短柝扇影亂孤燈茶
鼎香消歇藜牀暑鬱蒸明當遊古寺碁局訪山僧

秋懷

莫恨流光付隙駒蕭然隨分亦堪娛窮思論著才偏短
境歷滄桑骨豈殊講藝談文空復爾衣粗食淡未妨吾
有生夢幻宜先覺一飽何分智與愚

浮雲到眼倏經過世事悲懽總奈何閉戶詎須焚筆硯
避人仍恐釀風波業知黑白無成局若論升沈等擲梭
富貴在天憑界與漫教心血苦消磨

宇內何非暫寓形巖棲自古羨仙靈果能寂守長無恙
終勝沈迷竟莫醒性懶定然身鹿鹿心頽容易鬢星星
金丹有訣從誰喻肯向癡頑說與聽

悲秋安用託吟情風物當前景又清處已百年如一日
達觀有得便無營不才自合龍蛇蟄多病難資草木平
息養但能愁思遣夜來酣寢到天明

雨後閒步

霖霖積潦勢縱橫閒望蕭然景物清秋至風雲無定色
村空草木有餘聲歸鴉入樹隨煙暝雛鴨穿渠逐水爭
緩步卻愁泥濘阻途迂翻似避人行

李賡堂科試被黜見示感遇詩一首次韻奉慰

新


人丁亥羊城
旅館同寓

觀兗有志貢王庭肯負窮年試一經卞璞光韜頻足則

郢斤技擅妙心靈晚成容藉時藏器倖進徒誇目識丁

現試多有以
鎗替獲作名

老我名場三十載與君同是守氈青



卷之三

下冊

大馬站播文印刷場承印

懷李賡堂即用賡堂詠懷原韻

把袂論交正愜衷何期流水又飄蓬牛生已老元龍氣

一諾空懷季布風助我真堪呼小友

余齒過差賡堂

避人今

豈信長窮

余性疎懶且因耳病簡於朋輩應酬

舊知老去多零落石錯新

加幸有功

新詞唱和未終篇話別匆匆信少緣脫穎料知君不遠

得名翻愧我居先

余忝食餽賡堂猶應童試

文章鍼芥原相合肝膽

胡秦亮不然安得仙城重聚首青燈風雨共長年

同處貧窮仗舌耕家傳祖硯並諸生

余家青衿已五傳

箕

裘有志光前業山斗何人倚重名

賡堂向在省肄業師多名宿

握手

倘容傾肺腑奮身剛擬到蓬瀛

擬奏
堂現
北上

途長步蹇慚疲

馬翰爾青年學已成

河決歎

龍門一束千里勢瀕洞天生患難制導河積石迹已湮
美哉禹績誰能繼宜防自昔策廷臣糜費金錢億萬計
壩堤堅築役夫多置閘專司時啟閉河員旦夕急焦勞
沙淤疏通防壅滯堤工積漏或不修怒流一決無停逝
可憐蒼生盡魚鼈連州跨縣災非細廬井田園亦何有
風聞遠郡同悲涕比年直省水患多軫恤頻聞寬租稅
流亡四野傷未復至今雁戶猶凋敝那堪巨浸更滔天

嗟爾河伯胡爲厲我聞祀川河居先瀆視諸侯勳罔替
命官祭告豈不虔典重原殊空薦幣或云故道常遷徙
蓄久必決沿爲例中國患害古已然慘痛其如民命繫
漂流禍復何所窮願叩閭闔齊呼帝孝肅一笑未須清
亟與狂瀾堅約誓從茲順軌防無潰江漢隨同歸海溼
羊報依期任往還漕運無訾舟利濟瀕河戶口免其魚
行見榮光出 聖世

南漢雜詠

識兆天生石上紋門猶清海舊時軍霸圖未泯偏隅氣
黃屋紛紛擅作君

崔巍殿柱鏤旃檀沈水香消寶鼎殘二十四仙藏不見
瓊樓終覺易生寒

輦道鑾排百丈呼氤氲花藥滿仙湖後宮荒宴知亡國
留得江山作畫圖

內相新加女侍中丹黃判決語能工君王更製龍天字
何待詞臣頌白虹

人來拾翠儘同遊墮珥遺簪尙可搜萬樹紅雲開野宴
畫船蕭鼓徧炎洲

夜漏宮門百戲陳官家行樂逐時新笙歌自是聽來厭
內患須防角觝人

一橋流水泛名花
鬪取春光法倍加
那識美人歸土後
香魂空牘素馨斜

多少珍珠浸作渠
晝長宮內解衣裾
荒淫自古無成局
大體緣何愛媚豬

贈李豫堂兼懷其先哲昆祝岡

傳家自是擅清才
雁序蜚聲輩久推
不意高情收瓦礫
頓教衰鬢感岑苔
登龍舊事慚空憶
逐鹿今時敢共陪
文字緣深原易合
山陽終奈笛聲哀

題良溪上坑八景

良溪者新會縣地邑人羅竹坡風雅好客於是
地之上坑山鑿石築亭引泉種樹結嘯霞詩社

於其間擬有八景詩題飛啟徵吟張菊人司馬
函寄屬和因成四言六韻八首

高巖挂瀑

維山陡峻維木交攢晴飛沫雨晝湧濤瀾崖陰直瀉磴
道紆盤長鳴在礧匪激斯湍注之不竭測之無端倪盧
一面小具奇觀

曲水流觴

爰有清泉竊然而深跨山越谷抱石依林投杯可釀掬
月同斟潺潺飛羽泛泛浮金隨波上下沿澗追尋蘭亭
修禊此爲嗣音

竹林煮茗

修篁夾逕把臂同遊人來嵇阮客卜菟裘煩襟思滌清
話未休風迴落葉泉汲長流餅筌入聽蟹眼初浮樵青
供爨座上勾留

石壁題詩

沈吟礪谷吞吐煙雲眼前突厘腕底繽紛意超萬仞詞
掃千軍刮苔剔蘚摘藻揚芬巖巖共仰落落不羣磨崖
可勒儼策殊勳

山前策杖

岡阜重疊陂陀曼衍攬勝忘疲持危慎踐踣踣獨行徐
徐俯眄道險筋頽林深步蹇荷篠遑須捫蘿差免有似

引年剛逢賚典

桌上敲棋

博奕用心趣宜靜
領竹牖睡餘槐
陰晝永棐几橫
陳方罨嚴整輸贏一局興衰兩境先著常爭危機暗逞山磬遙傳豁然深省

榕陰鳥語

巢惟一枝雌雄互應
既知所止爰適其性
古榦蔽空驕陽斂徑
蔭暘停蹤支筇俯聽
樂意相關禪心入定
睠彼微禽清言如贈

松下樵歌

習靜空山微聞伐木響著丁丁涼生謾謾忽傳音調曼
度林谷似斷仍連如往而復鶴夢惺忪虬枝屈曲荷擔
飄然行雲共逐

午睡

睡起日光薄晴空正歛雲展書香篆燼上市屐聲聞暑
雨莓苔積幽齋鳥雀羣何時西潦退粒食慰農勤

重九日登文閣時將放榜

緣梯直上閣三層萬里風雲屬目興樹帶斜陽分遠近
村園孤塔聳峻嶒秋深丹桂香應滿霜後黃花色倍凝
遙觀奎樓新對峙憑欄倏欲快飛騰

秋闈報罷讀豫堂來詩感和即次原韻

逢時畢竟少機緣
風氣嗤隨世轉旋
鍛羽飛鴻難振響
脫韁疲馬漫勞鞭
家園自合身閒適
圖史甯防業變遷
此後劉琨安寢臥
聞鷄無復志爭先

棘闈久困味諳苓
缺劍原知海易沈
囊處未能忘脫穎
琴彈空自盼知音
短檠已是難回首
矮屋那堪再嘔心
濁酒一壺從潦倒
優游城市與山林

述病寄友

假館寓荒祠
居止有成例
忽忽二十年
茲所未層替
意圖家食便
不勞薪爨計
相距同里閭
朝夕往來遂
寢處

本無虞幽靜情與契豈無疾病遭匪屬皮膚累今歲春
夏間霖霪倍稱最積潦動兼旬蔓延莫能禦牆隙漏孔
多浸潤房室地書卷被潮蒸几案積污穢坐臥體不舒
形神日漸瘁倏爾經三伏暑熱復鬱滯雖未見於面病
已入脾肺迨秋赴省試旅次苦囂隘水泉既不潔烹飪
多失劑場屋迫期限舉動輒牽掣時小兒隨侍在省勞
苦獨自當文戰乏才思更值風簷中炎炎困天氣渴驥
惟奔泉遑顧飲傷胃勉強終場事疲憊幾欲逝相將就
里旋攝養門思閉詎料席未安兩足忽邁厲點點見紅
癰狀若魚眼殭由下徑達上徧股粒如穗浸淫至腰脊

寢食因之廢檢症雖有方投藥迄無濟遷延閱時日所
耗不貲費醫言溼頗重兼緣熱附麗緩治亦無憂未爲
身命繫步履幸無乖痛癢殊難制十指不停搔儼如蟲
嚙噬久困心鬱蒸急切愈隕敝竊維平生災此病良非
細小懲當補過內省知何爲口腹豈有貪我貧甘粗糲
麴蘖非所好少飲便至醉親黨讌會招有請常不詣朋
輩豪觥籌入座輒思避酒病似無因肥鮮更安致或者
體素羸夜坐評文藝風雨慢提防積久乘內弊一旦潰
而生瓜原有根蒂今後百宜慎時恐再貽戾讀易辨吉
凶庶免剝膚筮聊誌當書紳詳述何嫌贅

晚寒

薄暮寒雲起浮空見積陰近山情澹漠雜樹影蕭森
鵲啼潛依瓦鴉歸早占林幽齋人意嬾衰鬢感頻侵
朔風初捲地敗葉滿林隈徑卉猶在菊園枝欲放梅老
來思舊友病起問新醅轉眼年光暮寒深且舉杯

冬夜遣懷六首

蕭齋養病度閒年鎮日惟憑手一編欲向古人聊取法
轉愁濁世易稱賢名心老去如枯井壯志消來等逝川
堂上春暉猶待補承顏終竟愧寒氈

迂拙明知與世違撫心未覺向來非不爭奇服招嫌忌

翻使冥情惹刺譏褐被豈矜懷寶貴絃無安論賞音稀
自慚學道終難悟鷗狎何時可忘機

梅開雅合伴幽情魄濯冰壺徹底清坡老榻常供病臥
逋仙才不慣逢迎漫徇俗好爲身累奚假虛名誤此生
風雨一廬宜辨志敢緣頽放傲簪纓

閱歲幽蘭饒更芳也同籬菊傲清霜銅瓶水減枝還供
斗室寒深影欲藏憔悴自能完本質榮華何遽謝東皇
不須更慨凡庸伍空谷音傳譽倍彰

滿空風雪自清吟鬱鬱寒松豈有心尋尺縱難邀匠顧
堅貞奚至與時沈憑將直榦還天地誰向微材辨古今

但使巖阿能挺立高懷終許託遙岑

蠶到僵時未斷絲見機休恨曩時遲江湖位置仍無分
筆硯生涯尙有期聊藉狂吟消歲月還防遺行忝親知
家風在昔寒儒守野鶴林間祇自怡

憫窮嫠

隣右窮嫠無兒女年逾八十獨棲處茅屋半椽壁破穿
連晨不見炊煙起扶杖低頭行拾薪白髮蓬鬆垂兩耳
風霜歲暮常掩門日惟臥病在牀第兒童戲侮或潛窺
啓戶喃喃言不止嗟嫠平素我曾諳家住牛橋水溝尾
夫爲農圃富倉箱子好蕩遊結徒侶溫飽自信可小康

督責惟知向奴婢那意子亡夫繼沒子然一身無所倚
命運衰時不自由田荒水復傷禾黍產業消亡家變遷
四十年來僑居此人生既耄須子孫孤窮得壽人誰齒
天似有意界以艱特令饑餓恆不死一飯之施能幾何
撫衷終自愧同里

聞報質純遊泮

家風文事繼韜鈴駒齒還同豹變占異地懸弧雙璧合
青年鼓篋一門兼貧傷軍府戎行廢痛返鄉閭岷岵瞻
有子讀書看後起膠庠接踵慰幽潛

伯兄霽村先
科考進庠

郊望

秋深節物逼登高寥落關河感二毛雲帶曉陰歸洞壑
天浮遠樹出林皋園荒豆莢還遺種野濶霜風漸作號
多少征鴻延佇處不堪極目歎塵勞

園內杏花一株今歲逐月有花時已九月中旬猶
著花數朶

天氣雜寒暄卉木失其性非時吐豔麗過長亦云病厥
根雖未傷生意從茲罄榮落本有期一稟東皇令何獨
戀繁華直與秋光競春夏遞敷榮延賞彌增勝緬彼亢
陽詈物候迄無定遂使曲江頭爛漫還紛迸霜氣薄林
皋畦荒擬鋤徑晚境愛幽姿顏色宜素淨媚人以紅妝

冰雪殊不稱有似老年婦抹脂頻對鏡颯颯急西風籬菊炫明靚乘權傲居尊此徒作婢媵

晚步偶興

寥空又見雁頻過嬈嬈西風動女蘿葉落經時堆徑滿星微向晚入簾多籬荒歲久埋叢菊池涸秋來少敗荷霜鬢漸看人愛懶閒居何事悔蹉跎

初冬氣暖盆蘭花開甚盛夜起步月有懷

漫空雲淡月微黃倦枕醒來夜正長風轉漏聲深院靜暖蒸花氣隔簾香老來已覺身如贅睡少還同背有芒何日故人杯重把醉餘閒話憶聯床

觀壁上山水畫幀忽思遊眺

平生懶惰少出門臥遊但欲識邱壑興來狂叫忽自咎
誰遣家園坐束縛咫尺眞面未盡觀況能遠涉窮五岳
招邀奚患無朋儕逡巡祇緣惜腰腳壯歲憶踏樵山雲
登途風雪嘗大作衝寒攀陟尙不辭佳日詎堪謝孱弱
會須載酒駕扁舟選勝搜奇恣歡樂歸時細攷壁間圖
庶可胸襟從此拓

澆花

池水冬全涸園花日漸枯尙憐經手種未要倩人扶
病葉兼傷蟲乾枝已胥蛛勿辭勤抱甕老境藉清娛

過豹卿家同登露臺延眺

霜清天氣正垂陰
過訪閒將舊徑尋
除地築臺緣眺望
看花移步倏登臨
松排密密含煙潤
草色荒荒帶燒沈
當檻遠山憑寓目
新塘回首廿年心

經曉山新塘舊館

一片蒼涼樹木陰
當時蓮社競招尋
素琴已冷哀絃絕
荒塚何年大鳥臨
天外彩雲原易散
郢中白雪久全沈
交遊不盡人亡感
垂暮分明記在心

種菜

園迨無空地荒鋤祇半區
晚菰霜再茁冬芥雪偏腴
生

計資微物勞身任小奴敢云斯事鄙灌漑本良圖

閒遊探梅

梅林落後卻含煙遠近看同雪裏天春色隴頭猶未轉
已教詩興動花前

一帶霏微雪欲胎枝頭爲問幾時開卻嫌好景偏遲待
又累衝寒客再來

赴書院喜晤阮獻南

久別非經意相逢亦偶然從容文讌地談笑雪梅天寂
寂秋槐老悠悠講帳懸座中多後起握手已華顛

門從姪煇廷因友薦往外國教讀過辭

萬里鵬搏正計程
陡思泛海致奇贏
名高富貴慕文學
交重貧儒輕遠行
縱壑巨鱗欣有信
摩空健翮料無驚
惟憐十載寒窗志
遠涉依人尚舌耕

新製呢絨棉被

重衾何事侈青綾
臥榻剛逢美製增
祇恐夢魂清睡擾
不須酒力劇寒勝
敝袍自笑仍貧士
破衲差堪異老僧
且博夜來酣寢煖
管他屋瓦曉霜凝

登後山

鬱葱嶺樹未全凋
俯瞰平疇入望遙
數點梅花依草舍
半空松子墮林樵
嚴霜牧地牛還齕
寒日空山鳥不囀

登陟更思窮遠目閒行隨步上山椒

遊村外果園

夾道松陰傍晚行近郊農事甫收成
霜清涌口橋新建潦盡田間路卻平
雜樹暗圍雙岸迥疎花低隱一枝橫
遊看轉覺儒巾誤學植何如善治生

館齋題壁

經年寂處自埋頭坐對叢殘閱幾秋
此地合當吾分老一生不稱客途遊
文章俗忌誇鸞鳳姓字人呼等馬牛
門外車塵看久絕遺經猶幸紹箕裘

暗荒行

禾苗被野穀待收高原下隰如雲稠田家婦子竊忻慰
今歲可無水旱憂登場估擬贏三倍稍愜私願符車篝
稻花風颺新翻綠磨鎌且喜秋將熟稭漿上後恰天晴
粒實團應豐似玉老農睨之忽愁歎毋乃荒年暗相續
穠茲載穫雖充疇穗結稀難盈一束誰云力穡自有秋
一飽今知不滿欲行見家家廩復空向晨市糴加青銅
斗米百錢價倍給豈有餘力贍孤窮回思去歲夏潦盛
早稻歉收猶未病舉家坐待免鴻嗷似此真無策以應
連年辛苦冀徒虧仰屋依然等懸罄噫君不見耕農輟
食頻嗟呼敲門又聽來徵租

聚龍古寺

古刹荒涼落日斜輪囷老木覆簷牙百年淨業依鄉約
一院經聲帶晚鴉香火緣深空復憶蘚苔碑斷侈重加
閒遊最愛山門望遙對寒梅樹樹花

歲晚幽居

蝸廬雖小足優游案有詩篇意自投硯注寒冰猶拂匣
簾遮落日未除鈎梅花雪盛精神見竹樹霜凋勁節留
澹漠卻饒幽興在海鷗何與世沈浮

幽棲豈必慕高風觴詠何人可與同酒擬細傾方入雅
詩緣甚解反難工身閒棊局尋僧對性嬾書函幸友通

清晝蕭然酣睡足晚窗又見夕陽紅

偶讀周子愛蓮說戲爲推演其意

周子著蓮說品評爲君子辭約而旨深意蓋自况耳余
謂蓮一種衆芳誠莫比試舉而疏之一一臚所以其莖
直無曲中立不偏倚其瓣內相含深藏不露美有藕節
而通貞慧全表裏有絲密且柔根絡具端委高標出污
泥皜然莫能滓纍纍實滿房顆顆齊如齒心苦膚白腴
性淡味彌旨竟體固常芳適用尤堪紀藥裏配君臣材
多備佐使開從暑月間搖颺清風起涼氣沁人心鬱蒸
散何駛一葉海上乘星精來萬里九級幻成臺佛亦生

歡喜著述妙雄才花粲舌難止紅稻嘗假名究實終奚
似笑彼昏無知鑿令潘妃履何物獻諂兒六郎面輕儼
亭亭淨益芬遠望羞紈綺有白兼有紅宜沼復宜沚露
滴珠走盤雨過香侵几入幕致嘉賓言談謝俗鄙結社
約名賢風雅矜創始長日棊一枰清晝書數紙酌酒持
碧筒撫琴奏流水閒聽採蓮歌靜探愛蓮理乃知大雅
稱妙契非虛矣

晚後行園

飯罷逍遙日入時雲陰微轉朔風吹閒行徐步穿花徑
覓句無言俯水池竹列高低爭翠活茶開深淺互紅欹

鋤荒舊有空餘地擬改蔬畦作菊籬

書院余山長啟館赴讌晚歸

歸路籃輿急莫停和風拂面酒初醒近山樹暗看稠疊
遠舍燈微望渺冥感舊漸傷同輩少籌公何預老生聽

是日會議縣扎勒繳公項事

祇應覓醉消岑寂借作遊春覽物形

春日祭祀先

祖

考妣

有感而述

我生未侍王考妣曹然弱質無聞知幼承庭訓間有述
誦讀時復忘前規力田兩世劇艱苦但云繩武高曾宜
勝衣就傅不自勉祇從儕輩爲兒嬉年逾弱冠始遊泮
幸與伯兄相肩隨自維累葉巾箱繼弗事播穫力奚施

區區科第天豈靳奮欲得志光門楣中年偃蹇困場屋
文戰屢向秋風悲蹉跎學業迄罔進悔不耕稼紹東菑
抱疴寂處生理拙萬卷無以慰啼飢家承遺蔭原足立
門庭多故難支持庇焉縱斧誰爲梗局淆黑白旁人訾
明知庸懦自貽戚毋爲戎首戕宗枝世事過眼一泡幻
得喪要關造化司邇來筋力就頽憊深藏有意甘守雌
鄙哉硜硜性不變箕裘廢墜咎何辭先世積德慶未絕
或者禍可爲福基所嗟後嗣多失學淵明空有五男兒
團練局在書院會算讌歸有作

長日自掩關閒久頗難度細雨溼流光天意芳辰妬杖

策思出遊泥濘輒回步戶外屢無蹤蓬蒿誰肯顧公讌
歲有期乘興偶然赴舊知稀會面談言總俗務廣座接
對難交疎畧禮數把盞意良欣歸途已昏暮燈火見前
村林暗森可怖安穩坐肩輿不辨來時路

睡起

雲陰微散豁天青鳥語頻呼午夢醒小瀾釵頭消軟飽
閒窻弄筆寫黃庭

閏二月晦日大雨水浸庭舍

黯黯晨方興電光穿戶牖大雨忽傾盆童穉皆驚走行
潦如川奔渠淺淤難受我屋地低窪牆復非堅厚漏隙

水頻侵滙聚成淵藪浸淫入廳房器浮及盎缶竈溼廚
無煙腹飢坐且久日旰呼爲炊室人但搖手跬步莫能
前困等魚在罾婢嫗赤脚行刷地不停帚急霑雜狂飈
響甚長鯨吼須臾勢漸高險欲避登阜霑霖歲苦遭此
厄未常有於時春閏仲其日二十九過午晴稍開水落
已逾酉詰朝起掃除旭日挂簷口俯視庭寢間几榻沾
污垢貧家乏供役穿渠倩鄰叟荷鋤亦躬親老憊須抖
擻豈樂偕作勞冀免感貽後何以酬辛勤村醪沽一斗

園中即景雜吟

紅杏初出蕾綠荷已舒蓋梅雨劇朝昏竹露滴清靄當

晝淡無事景自與心會悠然手一編讀易觀其大平昔
厭拘迂脫畧原非泰才旣絀廟廊賤貧亦何害溫飽志
不在爲生要有賴置身天地間形體詎能外

園中有嘉樹自昔經手種風過散清陰幽鳥時鳴哢
比尋丈條敢冀爲梁棟歲久柯榦垂欲邀匠石用雖免
拳曲嗤偏難繩墨中遺棄在邱園閱歷增悲痛豈無大
廈材亦嘗老巖洞斧斤苟不逢猶堪以棲鳳

方池僅八尺蓄水窅然深纖鱗時一躍微響蕩我襟靜
中有真趣豈必重淵臨莊生樂濠濮語妙難推尋至理
本庸常觸處當會心但觀波與瀾終自異蹄涔所貴濬

其源毋使污濁侵萬象紛然來相看影盡沈

翠柏聳牆陰霜雪色不變自成太古姿意豈邀天眷桃
李競春芳亟欲先時見凋零詎不知其奈紛華戰人生
非金石過眼如露電歲寒苟摧敗絢爛復奚羨勗哉好
脩士骨性堅百鍊俯仰曾幾時毋爲世俗賤

幽蘭益盎滋易以雜蕪穢剔治去陳根華葉勤灌溉采
之遺所思願爲君子佩握手不相違心期邈百代蕭艾
矜向榮逞彼姸阿態臭味苟差池甯免淆憎愛士固不
求知亦非甘泯昧芳潔難獨居名高有時晦

花會行

賭花會花會名色多買山兼買田飛鴿尤紛羅手持片
紙出門去貪心安逐如風靡開傳票字爭先覩檢對鴉
塗逐字數偶然暗合喜聲譁以一注百願常奢傾囊不
顧家已破得者未饜失者嗟夢魂顛倒窮推測千文慣
亂塗朱墨害滋婦女亦狂昏釵釧典鬻同輸直吁嗟禍
端禁莫止大題又向掄才擬小場試後鄉會科中姓多
從榜花紀歲輸巨萬助軍儲餉併正供誰定議狂瀾業
倒勢難回因而爲用權措理廠首招題富貴全宦途俄
頃可陞遷市廛亦慕榮冠帶得采援例從報捐自從粵
局開圍姓文風不競賭風競舉國爭投鶩若狂恐此終

爲民俗病何當邊靖告 朝廷大撥人心返之正

送春

浮生逐逐幾經春獨立窮愁賸此身到眼鶯花空閱歷
放懷世事總艱辛文章力薄難延譽風月囊收不救貧
惆悵韶華今又去滿園芳草碧初勻

蠹

擾擾當昏夜向人膏血爭誰甘坐被啗一擲恐難生

蠅

適從何處來附熱聚不散拔劍逐誠癡吮癰亦可歎

題梁碧珊迂齋詩鈔

倪迂善畫已迂名迂在詩人見性情風雅洵違時俗好
詞章堪與漢唐爭搜來岐海波瀾富遙跂煙峯雪月清
天外一枝文筆峙騷壇後起合持衡

送若池五叔陞授崖州都司入京引見

歡聚纔稱慶鄉旋復遠征蛟龍乘雨躍貔虎際時亨客
路朝 天急軍員向闕榮秋時鴻信轉崖海仰英聲

端午雨中漫興

積雨悶幽緒庭檐滴復聞香囊嬌女佩藥餅穉孫分短
徑竹爭長空齋荷正芬誰家觴午節壁荔定沈醺
連歲蒲觴歇炊煙向晚遲家貧容謝客兒懶厭從師冒

雨鴉歸樹穿渠鴨入池小園憑獨詠未遣鬢毛衰

夏日喜梁震東見過

當晝攤書倦欲眠足音門巷倏蛩然蘭生幽室香初覺
竹覆空庭爽正延海外奇蹤增閱歷老來舊誼倍纏綿
匆匆客次相逢後握手重忻話別緣

日前曾晤君於粲三座上

震東遊日本海埠與日人三浦一竿詩篇唱和并

爲序江漁晚唱集袖以見示爰寄奉贈

驕陽簷曝炎煊張桃笙火熱晝眠妨茵蔯亭亭香正放
開徑延佇欲何望梁子溽暑忽過我手攜一卷森琳瑯
清詞訓唱聯中外展誦拂拂風生涼嗟余耳病懶出戶

終歲局縮如蠶僵舊交契濶音問梗快遊遑復騁詞場

憶昔穗城同逆旅別君倏爾踰三霜君困童軍屢顛蹶

翩然奮翮凌風翔鴻爪遠留海東國直探日出窺扶桑

蠻貊可行恃忠信況乃夷裔夙稱良緣深風雅易投契

高吟驚座傳篇章揮毫豈止富珠玉畫本兼法龍眠長

牡丹不買胭脂染天然墨采卻濃粧蛺蝶春風妙圖繪

一幅栩栩追滕王君善畫墨牡丹及蛺蝶鄭虔三絕稱自昔四奇

君又播夷疆日人三竿以四奇目謂詩書畫及品也人生顯晦時難測屈

此信彼名仍彰俗士但知攫金貝豈能磊落軒眉光似

君推誠洽異族深情比海誰能量登臨選勝興不淺席

地每共傾壺觴

地日俗禮爲席

積詩盈帙厚寸許珍同琛寶載

歸航杜門卻自逃囂俗如有良賈祕深藏余家去君不
數里地雖分壤猶同鄉客臘傳聞返征旆未能造訪登
君堂何期邂逅忽獲晤枉駕更愜私衷償把君詩卷動
遐纂品評敢妄加丹黃諸夷風格亦濃麗自可與君相
頡頏所歉賦詠畧風土輜軒未免遺遐方古來行邁尙
酬贈紀載要自留縹緲君今几席多清暇補登樂府調
宮商他日扁舟付漁唱海天翹首憐茫茫

謝震東饋日本紙

少小學爲文操筆輒伸紙性復喜塗鴉瑩案常需此文

字兩不工迨老空爾爾不知幾萬千枉卻先生楮本非
修鳳手奚用鸞箋侈吟顰效老坡麥光時鋪几故人海
外歸精購研光美細練出鮫宮堅滑平如砥不數剡溪
藤亦復勝側理饋我五十枚雲藍恰相比旣獲充文房
愛同金玉貯報之乏瓊瑤情薄反慚似

震東見和前韻寄懷疊韻再呈

垂老如寒蠅猶然鑽故紙平生仗石畊餬口同彼此鄙
性復寡諧不輕受嘑爾把卷計常迂年年勞刻楮雖濫
廁名場微末敢自侈君少志青雲與余偕硯几聰穎劇
多能書法尤妍美璞玉不終藏或者天礪砥只今遊海

邦顯達無殊理信義著遐方俗子何能比館穀况豐邀
囊並珠玉貯行見器晚成灝老龍頭似

霖雨歎

連旬陰雨絕氛埃庭除屋瓦生蒿萊蛙鳴閣閣池邊聒
溜響入夜彌喧阗道途潦水橫衝突茅檐傾塌墻崩摧
登場早稻剛載穫布野到處穀盈堆陽烏潛藏艱一曝
溼蒸芽蘖全胚胎憶當垂穎苗將秀田疇被浸憂成災
幸逢潦降穗結實黃雲覆隴雀聲催收成正擬倉儲備
那料旣刈還愁唉愁還唉翹首望天天難猜雲氣沉沉
雨復來何當陡聽一聲雷雨收雲散青冥開晴曦突出

慰農哀

秋思

懶慣真成疾愁多豈爲貧杜門艱著句觸景易懷人長
日閒中過孤燈分外親乾坤容寄傲何事問前因
半世耽殘卷窮年守敝廬自評窗下稿愧乏腹中書功
業非吾事才名屬子虛惟應花月共一醉百憂除

食蟹戲述

我生值清貧涉世祇爲口一飽豈他求珍膳復奚有少
日事嬉遊朋儕欣聚首過從閭巷間適意恆杯酒往往
共持螯開懷酌以斗爲歡曾幾時倏忽成老醜舊侶半

凋零閉門病且久祿養愧徒虛廩食增顏厚讀書注蟲
魚才名等敝帚垂暮竟何營百事居人後竊維朝夕供
蔬盆饜春韭異味那得嘗此腹終嫌負今忽慰饞涎復
見尖團剖豈須辨蟊螟誤慮同蔡叟令方嚴橫行捕治
窮淵藪也合烹含黃大嚼從屠狗

東震東幽居

短鬢孤燈易感秋一天涼雨逗新愁蛩鳴敗壁音微咽
雁到空江影漸稠垂老交情應共惜閉門旅食更何謀
異時倘許吟懷健載酒還同汗漫遊

秋冷三疊前謝紙韻寄震東

竹鷄聲亂鳴北風撼窗紙氣候纔秋分一寒遽至此擁
被怯晨興老懶固應爾亦緣在笥稀衣薄輕如楮世豈
乏號寒得煖遑復侈邈懷素心人履舄殊几几風雨發
高吟閉門甘晦美雅操本堅持不磷安用砥往昔接光
儀清譚聆妙理何日樽酒間重慰饑渴比瓊玖幸頻貽
勿吝徒緘貯庶令豁愁襟快忭莫名似

九日登文昌宮奎樓時學使科考廣州

三秋珠海湧鯨濤文戰方爭月旦高入穀聲傳誇技藝
奪標才著擅英豪黃花豔放同簪帽白紵裁拋乍換袍
連夕文昌星朗耀遙知佳氣兆揮毫

屹然孤塔鎮樓東
曉日初昇瑞氣融
檻外山光供點綴
簷前鳥語聽玲瓏
乘時雕鶚秋剛薦
佇目雲霄路可通
登眺正逢萸共佩
花開已見雁來紅

霜降後一日晚步玩月

霜落秋更清
庭月逾常明
靜坐厭長夜
起向階前行
階前時獨步
此景曾幾度
今夕復何夕
重邀嫦娥顧
嫦娥在雲瑞
任人注目看
不知他人見
可似我一般
一般同對月
懷抱各自別
悠悠身世間
悲歡兩難絕
難絕會有窮
願言駕長風
飄然衣袂舉
飛入廣寒宮
廣寒路雖近
奈無人指引
矯首問吳剛
何時桂招隱

棄婦詞

并序

隣有假子幼失父母貧無住居長在賭博場僱
工日得錢以贍鄰人緣無屋可棲娶婦依鄰人
同居甫成婚即往博場終歲不歸婦爲姑陵虐
復唆其夫回家使迫逐之閭里不平然莫能止
也感而賦之

遊鱗疎比目野鳥倦雙飛絲蘿欣有託結婚去年時夫
壻本蕩遊不樂居房幃新來初卻扇燕婉情弗違自從
合卺後博塞竟忘歸壻小無椿萱寄居作乾兒異姓即
骨肉娶婦恃相依那意姑惡呼莫逃假母威室中日詬
誅苛役苦以饑狼性狠而貪搜典嫁時衣寒深九月霜
篋笥空無遺凍餒猶未足惡言加謗誹夫也非不良見

面奈無期一朝蕩子返峻迫使此離可憐雪裏花難禁
暴風吹勢已委污泥安能戀故枝旁人憤且勸終竟無
回機垂涕別夫君恨恨長此辭

閱整飭差役積弊全案錄

挾詐官衙慣借端貪橫差弊更多般害誠狼虎驅猶易
毒比蝨蟲撲轉難士庶憤仍存國紀徒胥賤不缺周官
神明幸仗伸剛斷萬戶從今夢寐安

讀李鐵船邑侯香山紀事留別詩

宦途如傳肅征騎盛事欣聞解任時野老遠來爭識面
使君臨別轉愁眉香花戶供盈塵市明鏡街懸照路達

誰紀鐵城留惠愛河梁詩就已成碑

詠菊

勻黃點綴晚秋天合與人間壽命延
零落不教春色共枝頭長抱一心堅

開向東籬景最清似偕隱逸並逃名
柴桑豈是真忘世空費濂溪著品評

盆菊

盆菊分栽愛整齊一枝一朵無高低
將蕾當夏勞編竹未種先春已鍊泥
年年辛苦爲菊役矯揉不嫌生機逆
開時爛望漫如雲工天反覺輸人力
陳供華堂主客歡

移從花徑僮奴惜雖殊剪綵絢觀瞻終竟刻舟著形迹
我道不如植籬東密疎掩映煙霧籠臨風自爾饒真趣
秋光一角夕陽紅

隣舍

鄰舍新成傍小園忽遮雙眼隘前軒遠浮蒼翠松杉失

近益煩囂鷄犬喧牆缺斷行除僻徑

園外向有牆缺不久成路徑築居後不

通行樹高分蔭過人門漫防棗熟偷攀易肯爲微嫌起釁
根

答日國一竿先生見寄

暮雲翹首海天斜大地春生總一家三島信傳遺雁影

一枝香贈到梅花江深那共吟情比路隔空勞望眼賒
老我漁竿難把握煙波愁緒悵無涯

附錄來詩寄懷原韻
慣看落月又西斜
萬里同天本一家
支枕頻牽芳草

夢補樊長護紫荊花
海灣有路舟輕
殿村店成鄰酒
可除縱使愁人爲久別和將詩句了生涯

臘月初八夜偕顯亭鄉中步月時祠內建醮

倏動夜遊興緣乘明月光村居無勝景樂事憶他鄉市

店門虛掩祠壇旛亂颺更深街柝靖法鼓聽琅琅

哭家豹卿

里巷恆過從交緣少讀書相知翻悔早抱病卻令疎簇
簇蘭芽秀融融棣萼居向平心未畢一夢付華胥

藉咸偕結社舞勺憶嬉遊大夢隨同化頽齡忝獨留埋

花傷往迹

亡君側室悼

肯構慨前謀

分君有志儲建先德

親柩

猶停室知君恨未休

未生母葬

寂處名心淡終年懶出門寡交期省累守業戒輕言自

愛幽居樂常逃俗客喧晤談今已矣何處可招魂

兩番樵洞躡慚我後遊陪風雪扁舟共衣裘密座偎快

談頻剪燭畏冷重啣杯檢篋吟篇貯卅年首重回

題顧亭林先生像

勝朝遺碩果天意重斯文遇險剛能濟稱先志不紛研
經羅鄭賈授學比河汾嶽嶽丰標在崑山玉未焚

同入儒林傳如公有幾人著書真奧博名世足經綸學
業千秋見遺容一紙珍緬維門下士房魏冠朝紳
戎馬崎嶇會危疆絕塞經遊蹤增閱歷窮老困飄零精
力鍾遺逸空文著典型何人披日錄形貌寫丹青

開科徵博學 召試訪遺賢謝病殊高蹈藏貞善自全
才華潮赴壑言論日中天漫作文人看民生國計肩

謁姚少保祠

猾寇 熙朝熾能員劇邑傳戰功鐘鼎勒吏治郡州先
乘傳膺民社分符屬海壖清勤恆畏著沈毅動思全新
令嚴逋藪生民痛徙邊暴橫憑歛戢蕩析仗哀憐計定

盧循縛誣深武穆冤藩王章代剖縣令職隨鐫遺愛同
朱邑奇材擢巨川鱣鱣征戰久帷幄策謀專績奏平臺
紀勛高督部詮爵銜超將領冠蓋比神仙事去滄桑閱
人來歲月遷荒祠仍俎豆故宅未雲煙侍妾曾修佛緇
尼競奉禪鳴琴留畫像說劍渺遺篇蝸壁滋苔蘚犧尊
缺管絃松楸誰展慕蘋藻此明虔碑碣名難沒庭階步
敢愆香山崇宦祀後起孰駢肩

擬謝靈運古詩二首

登江中孤嶼

曠覽經川途溯江徧南北寓目晷還延游心境未息孤

嶼媚中州懷新眷攀陟曲渚渺迂廻奔流互蕩激入望
想超塵飛空思借翼靈物表若茲仙都信可即願言御
長風快意窮前劣

道路憶山中

哀猿檻中絕元鶴隴上飛物情貴所適中道易相違故
山路已遙悵望何時歸楚絃不改操越吟詎云非存想
樂其真追尋迹未稀坐石濯激流倚杖玩清輝濃陰夏
晝長落葉秋光微睠彼靜境緣息此塵寰機信知去鄉
苦肯辭懷土譏丹壑渺難歎綠綺時空揮行役動惻惻
長歌顧采薇

寄懷一竿

伊人不識面僻處天一涯我友梁伯鸞日遊與之偕歸
來指扶桑英俊惜沉埋高情比雲霄誰云非吾儕風雅
多同好座惟此士佳水竹一畝莊寒月照空齋聯吟慕
儔侶訂集事編排扁舟隨寄迹有酒願常諧詩成入圖
畫屬和到裙釵鷗盟海上波松倚雪中崖笑談劇意氣
脫畧遺形骸嗟余在中土垂老志多乖索居念友生鳥
鳴空喈喈何意瑤篇投倏爾愜所懷諦觀手不釋吟誦
眼楷頻恰如太陽光出海豁陰霾

送姪雲裳赴天津

寒冬曉色動行旌遙指津門數客程到眼雲山多舊識

雲裳曾寓申江此行亦由申江入津

隨身書劍倍縈情關河暫作依人計

門戶常存薄祚驚何日宦途看奮迹巾箱業振慰平生

大雪後一日餐菊小飲

天寒菊盡花黃金鋪滿地几案缺盤飧嘉客何由致曉
起擷霜英逡巡謀一醉呼姬具晨餐細膾同庖治凡骨
仙難成權當芝朮餌餅酒雖已罄市近幸可備獨酌匪
爲歡銜杯取適意未用說延年且思飽午睡

壬辰夏客羊城李郡守豫堂逢亨偕張司馬菊人

景陶過訪不遇菊人有詩爰次其韻

吟窩路隔屢徘徊旅舍空聞二妙來一面緣慳還見阻
五年懷抱竟誰開雲天咫尺達芳範穗石追陪愧薄才
自幸龍門容接久敢誇聲價起嫌猜

贈盧蔭棠

并序

順德盧君蔭棠應郡試與余同寓羊城客舍性嗜酒飲極豪比盧全七碗之茶有過之無不及

也醉後向余索詩爰賦絕句二首以贈

四傑芳名耳照隣酒豪詩伯本同親若教風月論清興
應羨君家代有人

剛際中流競渡囂今時郡守卻無驕是龍漫道人難信
看取名場小奪標

賀張菊人令嗣遊泮

夙聞古語傳善人必有後爲善遽望報挾持亦云陋天
道有時晦此語仍不謬煌煌曲江派遞世衍華胄古岡
分占籍儒風尙守舊賈不廢詩書良治重堂構風雅邁
前賢高吟徹宵晝著書輯牛戒不忍穀鯨就佳什走郵
筒斯編必兼授緬維愛物心太牢功獨懋

菊人嘗輯牛戒錄刊刻傳

送

喆嗣訓一經力學年方富類池豈足羈已擢一枝秀
果報雖腐談栽培自由厚行見丹桂攀不讓燕山竇

次韻菊人遊羅浮

投身濁世幾沈浮老至知難五岳遊往日圖經空寓目

何時仙蹟劇吟秋梅花有夢懷巖勝芝草無緣覓洞幽
卻憶西樵鴻爪寄從今東望更神留

仲冬晦前一日大雨雪

寒衾夜半忽如鐵短夢纔醒燈已滅暗窗淅淅數聞聲
曉起驚看天雨雪階前蘭盞盡堆鹽徧地瓊瑤麥瑞占
朔風撲面肌頻栗開箱喚取衣裘添嶺南自昔少飛霰
百歲老翁曾未見孝元故宅久沈埋孤松迹掃無遺片
道光乙未歲除前曾聞皓景開南天我生懸弧剛此歲
彈指倏將六十年兒童相對奇觀詫玉龍鱗門紛紛下
家人拾取貯瓶罌留作茶湯煎午夜蕭條街巷少人行

高低屋瓦見晶瑩市店填門喧賣酒還愁重壓茅檐傾
即晨我亦圍爐共攜壺倒注牀頭甕醉餘吟賞眼偏昏
曹騰似入梅花夢

壬辰守歲

庭軒前後徧芳蘭一室容身審易安老廢嬾將新歷檢
貧閒聊復舊書看歲除例借詩爲紀春早常逢雨作寒
爲問流光如駛速百年懷抱幾人寬

秋荷

秋風愁緒徧閨房冷露無聲下玉塘遠浦尙留殘照影
隔江空憶絳羅裳圓明證果消前劫憔悴羞容卸晚妝

幾曲闌干憑欲遍並頭人祇說鴛鴦

一池清影浸微波萬柄香消動薜蘿玉路盤傾仙掌散
絳霞衣裂曉風多愁生江浦歸帆路夢斷陂塘畫舫歌
料得夜窗人倦織雨聲入聽忽停梭

疊疊青錢買夏時明漪回首最堪思紅蕖豈解深藏恨
碧藕誰云遽斷絲江上詩情應苦寂簾前秋色尙紛披
西風會雪劉蕢涕蓉鏡休嫌及第遲

吹到蘋風翠蓋翻搗衣溪上隔荒村井梧月落催殘葉
堤柳煙輕帶舊痕冉冉香囊愁結佩亭亭豔質悵離魂
歌來驟雨新詞曲猶憶當筵笑語溫

和一竿次韻震東見寄

神交夢想倍新知來往郵筒卻恨遲
雙鯉躍從滄海日孤鴻迹隔雪泥時
東瀛風月全收篋南國鶯花亦入詩
兩地情懷看糾結扶桑真有萬年枝

和一竿次韻瓊峯見寄

溯洄秋水渺然深迢遞天涯共苦吟
從似廬山難識面也同夜月總懸心
春光到眼重搜句日徼懷人獨撫琴
自是高城風調永伯牙絃外有餘音

訪昌華苑

亡國山川長不變紅雲簇簇開芳宴
荔枝灣裏峙亭臺

降王一去渺難見繁華物產誇炎洲美人但愛金珠賤
遺簪墮珥幾沈埋皓皓長江餘匹練流花橋水東復西
芳草依然襯馬蹄昌華故苑知何處春雨冥濛路欲迷
君王昔悅波斯女層軒傑閣臨江起縱令遺址蕩寒烟
也擅風流作天子

瓊峯夫妻五十一雙壽

千歲蟠桃天上結花開正及仲春節人間夫婦紀生辰

雙逢佛誕亦奇絕

瓊峯二月十九日俱屬觀音誕日

東坡昔日壽

卯君觀音檀像曾雕刻今恰觀音誕日同期先一日邁

蘇轍

子由生日東坡以檀香觀音像爲壽詩有東坡持是壽外君之句按子由癸卯生故稱外君二月二

十日
生辰

駐顏難尋不老丹延齡復乏長生訣處貧久共守
巾箱濁酒一壺聊取悅青雲幾許盼飛騰讀書自愛紹
先哲文章憎命奈誰何回首空嗤耗心血石田爲生近
亦荒堆案殘編屢搜抉北堂萱草尙承顏雖老萊衣猶
未脫家門努力事撐持我慚爲長營謀拙艱難敢信體
常康履蹈還防行多缺百年倏已半光陰偕老要令躋
耄耄祇今祝嘏並佛前但求此後無磨蠹

虞美人

花名

名花端合比名姝楚帳當年豔影徂質擅嫣紅空灑血
香消淺瓣祇凝膚多情帶雨沈江水起舞隨風感霸圖

千載芳魂知未散長令春色入平蕪

龍山書院啓館奉陪山長陳保東大令泰階讌醉

歸寄呈

講席重經師修聘不嫌遠峨峨山斗望從遊名益顯文
學夙優長道行宜冠冕同焉資樂育造詣區深淺大匠
無棄材運斤隨物轉桃李被春風栽植乘時勉雷震百
蟲鳴贊謁期先展

驚蟄

啓館前一

遲遲日晷延寂寂槐階暖

絳帳起絃歌升堂迹待踐譬若杞梓儲勤作蓬蒿翦陶
鑄匪有私相期破萬卷我老已頽唐論文輒愧覲意厖
畏後生把酒聊消遣叨陪儀鳳姿慚類吳牛喘所願執

業賢才思如抽繭異時屈賓興競副掄才典

春思

朝來雲暗竟天漫料峭東風倏轉寒花事未過鶯語寂
樹陰初長鶯聲酸煙騰茶鼎香微覺冷逼爐灰燼欲殘
獨酌無歡難取醉聊攜書卷向明看

寂寞吾廬意自寬一庭新綠足盤桓
獨兒煖睡依茶竈燕子低飛繞藥欄
纔過花朝春欲老初生菜甲土頻乾
灌園抱甕知非慣稍習勞生分可安

閱白雲洞圖志憶舊遊

樵山何事繪圖傳展卷雲巖倏在前
人憶同遊亡過半

境緣曾識夢長懸飛泉砰磕還留耳峭壁峻嶒不隔天
且作臥遊追勝概鴻泥迹認未茫然

重九漫興

用放翁重九遣懷韻

霜落寒魚已漸潛晨餐蔬供味難兼離羣久罷杯中酒
遣悶時抽架上籤遠隔故人書懶寄新來小婢口逢添
登高采菊誰同興眼暗鈔詩且捲簾

送陳保東山長解館旋里

主講經年樂育深當筵杯酒又分襟光風接座忻懷昔
薄雪登堂幸侍今隴上梅開香欲贈齋前月落影還侵
長檠膏火初停夜鶴夢惺忪繞故林

離懷棖觸雪梅天桃李陰陰植滿前講席訓聆諸子佩
名山業就及門傳宵寒硯注堅冰結臘近琴裝錦里旋
何日論文樽酒再停雲悵望逐歸鞭

續海上秋吟稿次韻

爲護藩邦詔遠征赫然師旅耀韓城小夷臥榻思鼾睡
元老邊防調重兵本擬關河堪守險偏遭蠶蠹致隳名
堂堂節鉞連關外當宁焦勞反受驚

歐洲綏靖疊經年狼毒東隅復煽煙薄海頻看征戍遣
中樞翻失制人先長蛇自昔曾潛窟封豕乘機忽突邊
浪說攘夷功最大竟教管子獨稱賢

戰陣如雲列鵲鵝雷轟鐵艦湧洪波帥臣幾見填精衛
勇卒空隨溺汨羅威海風傳徒避舍牙山險失竟投戈
糜軀歎息湘南左報國中流挽倒河

盈廷奏上沮和戎不戰安邊曷有功馬市許開堂奧踞
軍貲素補庫儲空西隣債約重增息中國封圻已喪雄
財竭更虞紛伏莽閭閻生計幾時豐

舊將分符擅虎貔黑旗威望獨雄支全臺割棄空移節
瀚海堅持屢伏屍力竭關中籌餉饋謀深邊外固藩籬
何期衆志成城後糧罄終教莫濟師

臺嶠沈淪雁信稀何堪越瘠視秦肥經時力戰仍輸寇

屢月堅防倏罷圍胡虜憤深存虎噬將軍迹杳等鴻飛
藏身益見英雄畧湖上逍遙解弁韋

天涯重切杞人憂洋舶紛紛內地投營窟甘肥惟薦食
負隅險詐孰防秋摧關已見無遺利揖盜終嫌未善籌
遙望煙輪排海面轉疑烽火未能休

匡時寰宇正需才長策公同獻草萊一變轍應懲既往
萬言書可補將來杜門著論慚枵腹憂國消愁借酒杯
何日疆場揚我武重光日月四溟開

因事到書院偶登彭公臺有懷竹林司馬

鹿洞何緣築此臺說詩興教賴公來百年士氣經培植

五夜書聲有劫灰

咸豐甲寅紅匪倡亂院停講廢
爲練局至同治戊辰始脩

人愛

甘棠思佈德治當邊徼苦儲才海天吟唱知誰嗣翹首

昆明意轉哀

司馬著有海天
吟稿身後無嗣

姪驥甫冠往外國雪梨埠營生壯歲旋里同月遷

居畢婚喜賦

艱難年少切謀生別母何辭萬里程十載羈棲鄉國夢
一朝諧合室家情花開永晝紅氍映酒醉歡筵畫燭明
堂上盤匱偕侍奉好持玉琯發和聲

棣萼相依悵久離還家今已得追隨陸裝幸慰風餐苦
姜被應深雪夜思堂構未能恢遠畧門庭權且易前基

邁征此後須同勵庶令衰顏一展眉

怡循古禮告成婚衣線毋忘母氏恩蘭室始欣開玉鏡
筍厨連慶速高軒承筐有實惟姑喜主饋能調在婦溫
致富倘仍從海國老夫端望振家門

感溯當年斷雁哀家稱爲長愧栽培讀書孰步高曾武
創業還資子姓才但使分居能黽勉各安有室泯嫌猜
異時蠟鳳看羣戲轉盼營婚又輩來

和李勺園答人問詩

用原韻

性情詩道始作者匪由今漫識良工苦艱孤下問心有
懷隨境觸寄意向空尋絃外倘無著何從覓賞音

妍詞非愛好險語豈矜奇境自天然到情同海上移焦
琴音取亮諫果味須遲閱歷從君識多吟即是師
佳詠模山水流傳具夙因性靈關大造興會本斯人豈
獨般倖巧奚緣世運新抗懷希古昔風雅庶知津

又

三首

風雅本吾徒耽吟愧壯夫金鍼難自度鴛譜更誰摹李
杜光芒在歐蘇格調殊相期深學步萬派海同趨
妙手空空著新機簇簇生撚髭徒見苦喻指卻須明山
水緣相助珍蔬鼎共烹篇章雖小技一覽識高情

西江宗派盛粵詠曲江先唾莫前人拾詞非有意傳清

高琴韻遠雄壯劍光纏真性如流露憑君次第研

樹因上人爲小孫鎔光畫蘭便面賦贈

清修幾許悟蘭因葉葉花花盡寫真香到木樨同領畧
箇中何處著微塵

寂寂空山自吐芳素心雅合擅幽藏一枝寫出超凡豔
爲愛春風拂面涼

過白衣菴觀樹因上人畫蘭

抱病嬾出門藝蘭當前軒白維幽趣足相對可忘言忽
聞贊公房瀟灑絕塵喧寫生具妙手日遇神即存念彼
素心人嗜好有同源誰云非國香任埋衆草根芳心隨

葉露潑墨氣全吞色相本來空姿媚不具論持此臭味
投座上如春溫諦觀識禪悅一洗雙眸昏

樹因倩高麗尹溪石草書摺扇面見贈

幽人雅好書論古尋遺墨真迹幾流傳搜羅百無一自
經摹本後善書相繼出分體各擅長唯草尤奇特當其
下筆時勢若風雨疾豪情窄天地紙上見腕力高麗有
寓公妙入張顛室避亂來中邦書名動僑匹賣字可爲
生遐邇爭輸直我識懷上人學書池水黑蕉葉走龍蛇
姿致亦橫逸偕同遊方外晤言交倍密契訂文字緣有
求無弗得貽我便面觀惠風揚此日珍之比瓊瑤留示

後輩式

上元夕望月有懷

歲開今夕月初圓皎皎冰輪出海鮮里巷醉餘簫鼓競
樓臺深處畫燈懸盛時景色還如昨省會風光豈異前
遙想京畿冠蓋客就中無復動高眠

掃除氛翳湧金輪萬里光輝接紫宸耕鑿豈能忘帝力
尊親應早識人倫

時各省紳商電稟總理衙門
請皇上復行親決大政團團皓

月方升夜落疏星尙拱辰會見寰瀛消沴氣安排東
作候寅賓

秋感

天地方晦盲生民墜塗炭擾擾五大洲無時息禍亂中
外等一家種類原各判邦域滿寰瀛文明華獨冠職方
紀周官輿圖難悉按接壤界強隣併吞時暗筭閉關拒
不臣王朝尙清晏獫狁猶內侵莫由靖邊難遠伐重勞
師始自秦與漢蹂躪逼京畿旋聚亦旋散於赫帝王州
亘古戎難斷今忽門洞開互市炫珍玩萬國競通商輪
船遍口岸異教紛來傳大道彌漫漣明知臥榻側不容
他人鼯積弱自中邦恃強動欺謾世復多莠民邪說相
參貫煽惑聯會盟呼嘯成背叛仇教思滅洋橫行了無
憚坐此勢蜩螳牽涉每援案隱忍政權撓 宮廷慨宵

肝內治兼外攘指望綸扉贊激忿未遑思禍端肇一旦
借彼桀黠儔反作干城看兇燄已蔓延忠憤還褒讚妖
術豈足矜國患奚從扞卒至輦轂間無地可奔竄鎮日
響轟雷屍橫傷炮彈民命亦何辜徧地遭糜爛浩浩劫
同填撫膺一長歎

辛丑春正雜感

黃昏微雨薄寒加老眼空嗟閱歲華大地山河仍似舊
彌天陰翳未全賒聽來吉語年方慶望隔長安日轉遐
閒坐且看春富貴東風已放故園花

上元燈火接通衢歌舞開場且共娛垂暮豈堪耽寂處

閒遊何憚屢招呼紛紛世局原同戲擾擾塵寰轉厭拘
河俟百年還有幾漫輸後起醉屠蘇

濟時籌餉仗蕭何新例捐抽粵省多祇爲光鷹期足欸
竟教飛鵠亦兼羅青年好博惟營窟白晝探丸孰詰窩
在昔五羊誇盛著今誰同聽木魚歌

俗壞由來貨利爭米珠薪桂竟何營艱難復值捐輸重
攘奪拌教性命輕學廢漸同趨狡獪饕餮驅遑肯顧聲名
防抽博局紛承餉文士多從此業生

陝省凋殘歲屢凶賑籌久已困司農倉儲旣苦兵爭失
漕運還虞道阻逢紅朽散陳知莫給 翠華駐蹕更難

供天南協濟傷民瘼舟汎西安路幾重

傳聞行在議回

鑿薄海忻看弭衅端中外一家前代

盛利權同享列邦歡天心已極文明展民智須知學力
殫寄語田間諸父老好扶鳩杖政新觀

老大徒傷坐廢餘春來氣煖體初舒一枝班管時還弄
數卷殘書業半疏閒覽報章知世事自編吟稿等鈔胥
濁醪有味浮生寄倦眼看人駟馬車

樹因惠羅三峯竹何榆庭牡丹畫各一幅

上人好畫寢成癖搜羅徧訪名手迹偶然入市見出售
傾囊付與不論值攜歸張壁注目觀極意摹倣期一得

積久几案紙盈堆畫本恆多供蠹蝕平昔畫蘭擅絕藝
名噪翻嫌爲人役逃禪不能擬逃畫意託焚修避密室
蒔花栽竹興復增編籬灌溉無停刻禪房自愛花木深
畫蓄因多稍靳惜檢尋兩幅忽我遺語我珍藏勿浪擲
我笑謂此君棄餘奚仍重視同拱璧盍再揮毫爲我多
畫幾本蘭使我一庭芳草互生色

題何榆庭軍門畫牡丹

獨標剛勁寫名花姿態偏饒幹不斜豈謂有心圖富貴
春風閒管入文家

祇憑淡墨做姚黃不買胭脂競洛陽莫道粗豪虧本色

自來名將薄紅妝

家小衡茂才新刻陳壺翁遺詩見贈

春晝苦長寂午窗睡初足小雨潤前楹漸覺庭草綠
倏接故人緘新編恣快讀邑舊有耆儒書畫悅人目
名藝噪一時守貧閤芳躅結交累詞客風雅紛相屬
興尤山水圖下筆輒成軸往往半縑傳獲直同瓊玉
吟篇不經見朋輩時敦促畫卷每自題天機隨所觸
短句並長章語妙全祛俗悟道具前因圖詠矜尺幅
過眼慨煙雲散佚罕著錄吾宗擅俊才舊契情倍篤
遺草代搜尋皮藏恆在麓劍缺久埋塵珠光忽出櫝
三絕還鄭虔奚俟黃

金贖壺翁詩固云比之雪冤獄

次韻秋帆題鼎湖山志並招同遊

老懶困跬步無復追舊遊故人遠寄書爲作探奇謀鼎
湖訪幽勝買櫂約同舟憶曩樵西行登覽神還留自從
閉戶居退院如僧休星巖暨蓮洞蓄志知難酬圖經倘
我閱過眼亦川流君固腦力健宦適近端州學署富清
暇日惟圖史收按圖披古蹟一一冀全摛歲試矧展期
文戰停高秋導游既有侶快共扁舟浮行樂幸因時奚
事更呼儔遙想逸興增題詠徧巖邱歸來寄一緘俾誦
豁昏眸惟君職訓士芻言並寄郵甯地僻且澆勿使愆

乾餼

重九日偕香池星橋瓊峯登鍵星閣

秋高風物尙清華傑閣憑臨眼界賒一港前橫流水緩
羣山遙隔夕陽斜危橋板跨懸雙岸雜樹叢圍隱萬家
寂寂近鄉農牧地閒遊奚事擬乘槎

禱雨吟

歲歉窮黎久苦飢經秋雨澤復愆期令君屢作桑林禱
蒼昊何緣竟未知

龍宮日日共拈香僧道爲壇叩上蒼滿擬綠章能奏達
空教饒鉢聽琅琅

粒米年來價似珠何堪禾隴盡焦枯
占時偏值膏屯象
愁聽農民繞屋呼

災黎待賑正方殷今夏曾經水潦聞
蕩析瘡痍猶未復
炊煙一望絕江濱

時事艱危苦戰爭全憑火器判輸贏
老天亦若資強寇
特遣驕陽兆亂萌

如焚天氣劇心憂
榮確頻聞響水溝
怪底陰陽乖節候
葛衣同御過深秋

白是癡龍懶不興
深潭貪睡旱彌增
饑窮攘奪紛紛見
奚止焚厓慘莫勝

雲霓望切意難禁一寸甘霖一寸金爲問當途賢牧守
曷消民瘼格天心

喜雨

一雨眞成萬戶金上天終久順人心未覩禾隴生機活
已聽蕉窗溜響侵粒食尙厘官府慮葛衫乍換里閭襟
節逾霜降涼初轉晨起濛濛霧氣沈

次韻秋帆涼夜不寐感賦即以奉懷

睽別經秋雁影沈遙天一望暮雲深鄉情愁待他時話
世事憂同此夜心霜後黃花方豔放眼前衰鬢漫哀吟
行看鶚薦春明上新閣成應兆好音

秋帆年逾六旬來
歲尙擬赴公車

老病歎

人生在世難長保少壯倏已成衰老平時血氣任消磨
至此始知康健好壽夭雖由天所定攝養要宜衛生早
悠悠自棄齒頰增垂暮坎壈空懊惱居家爲善最可樂
東平此語良堪寶縱無福命可延年返躬亦自寬懷抱
煖衣飽食復何求終勝窮居就枯槁嗟彼白髮已垂肩
寒酸慚負此頭腦遇歲常形戚戚容徒爲身名悲潦倒
豈知命運本難爭曷若優游靜探討胸懷淡薄足養生
奚事經營怒如擣兒孫繞膝且自娛年齡漫向蒼天禱

賀年刺

新歲互投刺拜賀憑一紙揆之結納情其薄恰相似人
遠猶可諉室近何須爾豈禮尙往來深恐忘交誼或者
風雨阻出門艱步履檢刺付伴來道達亦良喜然旣同
里閨心印焉藉此會晤况非難遇事常聚處舊來今不
來或反招人議總之務虛文其道無足恃世俗沿爲例
終莫究源委不如兩渾渾淡然以相與得間輒過訪清
談味彌旨蓋非官宦場此刺原可已

代孫鎔光贈別遊學預備科館教習日本松永先

生

東亞文明教育開誼聯同種仰鴻才研窮物理推神悟

繪畫天機入妙來

主繪畫科學理

屢月晤談欣指授暫時握

別肯心灰人生會合非難再翹首東瀛日幾回

壯遊預擬豁胸襟忝藉薰陶獲益深藝事允宜專主席

訓言尤覺等兼金離懷尚冀重傾蓋定向何圖竟改針

督憲現欲遊學
科方言館

漫慮曲高將和寡淵源回溯盡知音

賀旅美本都華僑同善堂在花旗大埠建築高樓

落成五言古體一首

中邦尙文學積弱久非古坐此財政空誅求累商賈民
雖四百兆困窮難悉數軍備既不修殖民幾無土歐風
日侵入肆意多輕侮互市炫珍奇貨幣輸敵虜利權盡

外溢官復苛如虎戰禍歟重賠抽捐到環堵嗟我清國
民謀食彌艱苦冒險涉重洋意圖升斗補外政譏察嚴
動輒遭網罟幸而天聽開置吏勤招撫邇來各大洲華
商力愈努隨地積金錢報効歸天府極賙及同胞遠適
不忘祖今聞我都人合羣善會組巍然築高樓有目忻
共覩從茲團體堅惠被鄉邦普學校廣儲材工藝兼農
圃扶持故國危路礦紛占股行見憲政成整軍復經武
交涉免煩難海國聯同譜英雄造時勢勇願諸公鼓一
戰返舊疆太平洋作主

都局喜晤阮獻南

明舊凋零盡相逢亦偶然青衫仍往日白首已殘年閒
話聯牀憶新歡入座懸共論今昔事過眼幾雲煙

水患

夏潦兼天雨頻聞各縣災比年籌賑恤外庫罄貲財魚
鼈蒼生苦豺狼白晝來初元新氣象粵地獨堪哀

澳門劃界

強客翻爲主從何地界分國危因佔據歲久仗傳聞保
守嚴疆土爭論恃約文汝陽如盡返口舌策殊勳

沉譜年逾六旬續婚戲呈賀新郎詞八章

七旬將屆續鸞膠大過詞占第二爻却羨春風先識面

蘭閨預備結香巢

君已先得新人小照
在石岐賃屋迎娶

溫嶠耆年未長鬚
鏡臺再聘得名姝
料知花燭筵相對
却扇偷窺訝老奴

牀前白髮伴娉婷
銀燭燒殘夢未醒
一似渡河織女夜
牽牛忽變老人星

久擁皋比歲月磨
學編新訂女兒科
從今教讀香閨裏
益比生徒獲定多

新妝爭愛入時誇
老眼頻看興倍加
寄語畫眉須好細

莫教狼藉笑昏花

杜工部詩狼藉畫眉闌

回憶當年賦好逑
鷄鳴無限意綢繆
俄成四十餘年夢

又訪仙源再泛舟

特緣似續願猶虛
顧影兼同牧犢居
今日宜男香草占
合歡氣已兆充閭

老蚌乘潮止上灘
秋深月影復團圓
明年荳蔻胎含結
定產雙珠入掌看

初夏幽居

樹長濃陰合高低
竹影潛雨餘花覆
檻風定燕窺檐
茶鼎煙輕颺爐香火
再添觀書當午倦
老愛睡鄉甜

賀沅譜六十六歲初得子

蘭閨一索果宜男
湯餅筵開興倍酣
爲父計年剛疊六

生兒逢閏怡雙三

六時閏月

啼聲客聽知英物晚景丁添播

美談記賀續鸞徵喜兆蚌珠曾祝早胎含

維熊吉夢喜先符共話生稊笑老夫此夕懸弧誇閩瑞
他時戲綵學庭趨投懷久盼來麟種垂暮今看獲鳳雛
傳業有兒應告慰著書便擬作良圖

秋日感懷

辛亥八月

星躔流火已經秋颯颯涼颼起暮愁邊界漸看淪異種
朝綱終莫策奇謀風雲告急隨時變鄉邑聯防鎮日籌
老我餘生徒注目閒居惟切杞人憂
捐餉頻聞肇釁端憂時無計挽狂瀾民情好動撓偏易

國勢圖強振竟難力竭軍儲空豫備心傷吏治總苛殘
內訌外侮消何日翹首中邦不忍看

蕭條物候感凋零歎息閭閻禍變更遍地萑苻深窟宅
滔天災浸劇滄溟流亡轉徙憑誰恤寇盜侵陵况岡甯
安得救時良相出盡籌一爲洗羶腥

築路原爲保主權釀資興辦捷爭先商場利肯居人後
國債危應怵目前底事宜囊私計逞頓教衆怒禍機延
叩閣拒約甘拌死送別悲同易水傳

秋成禾稼損頻遭米粒如珠物價高苛政未聞除虎猛
飢民空復歎鴻嗷凶荒亂易資強盜劫掠防難庇富豪

司牧尙仍科斂急撫循幾見爲焦勞

工藝籌興抵漏卮民貧國帑曷維持利通航海權常失
債負強隣力益疲入市漫同趨異物設官奚事擅居奇
般倖自昔稱中土肯讓西夷巧構思

儲材佐治遍瀛寰交涉何堪勢力孱興學漫云違祖制
分科原擬濟時艱膠庠驟變遺榛莽風氣初開雜蒯菅
浪說自由聯黨會爭端恆見阻愚頑

宇內方殷憲政行 詔開議會播先聲朝章取決徵輿
論閣制專司任主衡京國才應嚴上選城鄉士果洽公
評濫竽未必無東郭廷烏何當勵一鳴

滿庭風雨氣蕭森日擊河山慘象臨西省兵民連暴動
東陞疆域屢蠻侵飛毬製創空中器戰艦修傳海外音
獨怪樞垣偏夢夢處堂燕雀罔驚心

漫託悲秋宋玉懷顏年心事費安排浮名敢信離塵縛
濁世奚能靳俗諧半枕酣眠醒曉夢一燈長伴坐空齋
觀時合向東籬隱晚節黃花色自佳

李達廬孝廉贊辰寄贈鐵城三先生詩稿

吾邑李菊水吉士二明經素以詩名後陳瓊壺
孝廉踰起尤書畫兼擅陳孝廉詩稿前家小衡

茂才曾刊一帙見贈余有詩紀之惟菊水吉士
二先生詩向未獲讀今菊水曾孫達廬君並陳

孝廉詩合刊名曰鐵城三先生詩郵寄二冊浣
讀之下漫題二絕以誌

一門詩學久轟傳
鴻寶家藏祕未宣
喜得曾孫稱有道
巾箱業紹梓遺編

棣萼聯吟重友生
詩才難弟並難兄
就中三絕陳居士
鼎足芳名播鐵城

小寒後一日雨獨酌

朔風侵晨撼窗戶
睡起擁衾正危坐
天色沉沉訝未光
忽覩檐前雨聲墮
風寒挾雨灑紛紛
吹入空庭細不聞
重裘著體肌仍栗
手皴凍拆等龜紋
陡然憶昨逢寒節
頗疑天公欲下雪
未須沽酒佐朝餐
亟向紅爐薰手熱
衰頹近覺步履艱
閉戶栽花祇愛閒
禦寒惟恃杯中物

醉後酡然一壯顏

虎蟹

爾本無腸物居然冒虎名斑斕皮競耀兀稟勢橫行箝
利沿厓攫膏肥愛鼎烹眼同蛙怒突爪比蝎多生澤草
豐潛窟田芒擢便爭霜黃含玉液月黑嘯風聲介被威
行海脾聞暴伏阮儲筐憑毒噬附翼擅苛征蠢爾騰江
澣終之陷竹籛豪胥與猾吏應許表同情

鄉校初行畢業試驗科員來堂監考是日天雨寒
甚往觀歸後有作

冒冷出門去登堂客欲歸尖風殊凜凜細雨復霏霏試

事久成夢名心未息機參觀懷舊學翻覺向時非

科學經時變逢場憶幼年自嗤成老朽轉祝軼前賢頗

異風檐苦仍難晷刻延衡才誰執筆寒甚手頻僵

入校成童始程功倏及期人皆年甫冠學已藝深知卒

業逢新政

新民國立

升階俟異時寒梅剛並放春欲占高枝

春寒即事

已屆花時盼放晴忽增寒雨細無聲連番蓓蕾團遲綻
竟夕颼颼凍未輕曲徑泥深妨屐齒空庭晝晦漾簾旌
爐香爇後煙全散愁坐窗前把酒傾

東風驀地轉嚴寒重檢衣裘著體寬花事半開遭天閼

春光頻帶似凋殘魚潛水底聯腮伏鳥困枝頭比翼團
午枕乍醒慵起步小園連日罷憑闌

三月十三夜偶作

小立空階下悠然皓月生花殘春欲去室曠夜逾清盎
貯朱魚唼窗紛白鳥縈徘徊人盡睡閒步到深更

汪君半樵爲東坡先生拜生日招飲徵詩穎堂翁
以所作七古一章見示依韻奉和

名賢嶽降詳甲子景仰後先同一揆宋朝詩老推東坡
兄弟聊翩翰苑起當時把臂入詞林浩蕩才華江海深
名高轉易招讒忘幸賴深宮降玉音

宣仁太后聞公以詩獲譴謂哲宗曰

矣拊公過於詩其罪微

出守餘杭敷善政蘇隄來往民欽敬

何圖再謫落瓊儋禍始蔡章稱紹聖天南喜得巨公來
春婆一夢爲公哀至今詩獄傳千古縲紲同悲御史臺
浮雲脫屣公洪量墨蹟流傳價無上豐湖訪勝躡遺蹤
鶴觀昔曾留畫像桺榔菴裏手頻書歸期卜後悟真如
長齋不羨鷄豚飽秋露閒來剪韭蔬讀公遺詩增感觸
煩音盡洗箏琶俗江湖遊歷得詩人遷謫何須咎朝局
觀潮有客宰錢塘遺愛曾聞比召棠夙慕公才爲公壽
酒漿羅祝趁辰良人生仕宦渾如夢僕僕風塵厭迎送
何似歸來手一編把酒琅琅花下誦春回轉瞬月重圓

幾人醉憶祀坡仙我生才拙慙吟詠得公遺硯亦有緣

辛未羊城旅次購得公遺硯名自笑鄉居常簡率老愛栽

花送餘日詩壇無力任執鞭惟冀食眠安且吉

癸丑 放燄口

佛法廣大果何有其最著者惟燄口陰陽雖異性則同
死後寧無需漿酒人鬼殊途各有緣饑寒普濟到重泉
沈淪可免三途苦誰其造法出生天我聞地藏憫浩劫
特創施幽一善法遊魂從此慶超生僧徒傳誦消冤業
異哉經咒信有功爲告世間諸富翁濟人還須兼濟鬼
勿庸當作耳邊風數襲紙衣一盂飯詎能永解幽冥困

須知法力本無邊粒粟幻成千百萬聖賢講學視同仁
侈言博濟重生民漫嗤佛法多荒渺持論要能治鬼神

次孫蓉森畢婚初行親迎新禮穎堂來詩道賀依

韻奉

自嗤華髮久星星兒再爲翁又過庭擇配親仍兼舊誼

孫媳之祖父少曾與余同硯

結婚儀賴有前型

穎堂次子去歲曾文明結婚

燕謀

疊見成雙喜鯉訓慙無授一經今日演詞頻示教

在祖訓行

禮各賓登臺演說

來賓深幸眼垂青

夏日園居即事

綠蔭圍窻暑氣消閉門聊且卻塵囂閒中詩境清如水

午枕醒時著意描

小池萍聚掩波光
雨過時聞菡萏香
日永柴門無客到
臨軒消受午風涼

傍牆脩竹劇森森
雜樹相交覆綠潯
恰好紫薇花正放
斜陽一角逗清陰

八十一歲自壽

八十年華等逝波
回頭空自悔蹉跎
功名已付滄桑劫
頑鈍還依歲月過
身歷六朝慚志節
眼看兩代厭兵戈
閉門擬學忘機叟
恨未江湖理釣簑

寒門先業忍拋荒
繼起何人志顯揚
處世固宜安淡泊

讀書奚竟拾糝糠敢徇里俗蒙虛譽恐墜家聲守拙藏
疎懶自知成痼疾老來更愛黑甜鄉

壯歲隨人作活誇文章終賤比泥沙一攀貢樹成何用
十屆鄉闈總屬差幸有園池存小築權將詩酒寄生涯
天公位置非無意贏得閒身日種花

靈犀一點悟天真既耄尤當惜此身餐膳極知宜自衛
胸懷那事復求伸儘憑造化留羈客姑任兒孫祝壽辰
試計百年餘有幾願從佛祖問前因

李澧川楊穎堂楊冠璧家藹臣諸君見和前詩賦

此奉謝

頌來佳什滿琳瑯巴里慚叨賜和章瓦礫竟教能引玉
慕葩翻幸倏蒙香詞人自昔多稱譽賤子那堪徧頌揚
天眷偶邀躋壽考筵開同藉此增光
顧曲從茲獲正音佳章投几雅情深延年漫藉金丹服
介壽翻逾玉液斟耄境慚余呈拙句賓筵荷衆發高吟
行將紀錄存家乘永使兒孫感下忱

奉答李卓生世兄賀壽七律二章即步原韻

穗城荆識羨英風發軔從茲氣誼融握晤忝居前輩內
論交慚蹈小巫中曲江友愛長源共越石名難祖述同
惠我兩番叨序壽稱揚愧煞一衰翁

戰爭時局未休棋百里才難慈惠師保障功方褒北闕
侵陵衅復肇東夷育才暫廣牆千仞紀績還需筆一枝
他日身名欣並泰躋堂祝頌酒盈卮

奉答家昉山族姪賀壽七古一章即步原韻

昔讀離騷矜樹蕙小園栽種無停歲花開飛鳥招王喬
來賞芳名一一標老朽家居多暇日對花品題輒弄筆
菊爲隱逸蓮君子似此幽芳更莫匹吾宗後進有英豪
振翮行將萬里翔先德蘭臺夙相契穗城文戰每同鏖
人世擇交重意氣取友要期已所畏受知同歲列膠庠
不才忝先叨廩餼當時壯盛恃年華走馬欲看長安花

那意棘闈如因獸張牙舞爪空攫拏溯昔郊祁大小宋
弟兄同榜爲朝用君家伯考歲進同青衿嗣響人稱頌
巾箱傳業更有人繼美迺復在君身書香蟬聯七庠士
一門慶聚喜無嗔令祖先生字乾大處境福厚身名泰
我曾踵府覲光儀欵接後生氣和藹時剛叙慶舉婚觴
賓從雜沓坐盈堂往事追維如在目奈緣住居分城鄉
厥後兩家仍紹業朝綱一變行新法士趨學校習分科
君聯孔會情尤洽眼前多士偏如林笙磬果否能同音
惟我衰頹屬故老贈蘭猶存夙契心

楊君穎堂因暴病遽爾捐館賦此誌悼並以奉輓

神交千里昔曾聞一面緣慳忽悼君

余與君素未相晤

偶藉投

詩徵契合屢承通札致殷勤爲生竟爾成朝露垂老偏

教感夕曛

余齒比君差長

見說萱幃還健在何堪一瞑赴修文

聞君現尙有母在堂

世變浮沉感此生習醫家別擅專名

君曉醫理次子及媳復俱從醫校畢

業同文章詎限通人業庠序全捐俗士情賜和新詩還在

檢

自月前壽詩四章

聯吟遺稿定誰評

君與附城各友迭唱和

有兒疊

起聲方茂投箸奚令噩耗驚

聞計時余適晚餐

積潦

門前積潦水舉足困跬步細雨淫晨昏污泥遍行路塵

囂緣近市客至難當戶貧欲決西江反疑甍涸鮒

重逢遊泮感賦

談話從教鄙老生回思發軔步鵬程文章試已更新體

清末試場改
八股作論

庠序科誰錄舊名

兩學職署
經已廢置

幸貯巾箱傳

後裔

長孫叨
列在片

漫營樽酒宴耆英同袍零落行看盡黌案

猶存首主盟

是案首名楊
鼎光尙存

共和國造罷文場無復槐花舉子忙學校備員誰入選
教科多輩乏兼長抗顏尙許稱紳舊序齒翻嫌屬老蒼
差喜孫曾羣繞膝賀翁新又掇芹香

行輩驕人恃雪巔未能則古僭稱先簪花豪興徒誇耀

試草遺文早棄捐
市衫曾拋白紵

是案覆試詩題利
市襴衫拋白紵

風流名復寫紅箋
掀髯對客真堪笑
旣羣還班弟子員
曾叨鶚薦換青襟
貢樹攀來歲月深
身世敢云完璞玉
門庭猶記貼泥金
升沉豈竟因窮累
消遣聊爲入醉吟
莫詡泮林崇齒德
老年終似尙童心

贈黃少東明經應樞

記曾食廩後先同
握手權存事矢公
往日勞薪原共荷
今時貢樹亦相蒙
棘闈已屢遭刖足
蓬巷知難再執中
老我餘生惟握管
衰顏聊借酒添紅
抱負如君孰敢輕
六旬往迹尙堪名
束裝京國期高騁

就席城鄉主校程自是多才難蠖屈兼緣廣譽致蠅營
兒孫後福由家長垂裕今看又振聲

昔聞九老會開時就中多半屬余知吟壇幟拔爭前輩
洛社名高絕後趨白傅襟期同瀉落曲江風度表殊姿

新編酬唱聯成集展誦曾經下走披

穎堂楊君曾將
聯吟集寄閱

往日韶華已逝波古稀君亦老巖阿歲寒尙冀同堅守
世變還期轉太和此後優游憑自得邇來調攝復如何
靈光殿必巋然立人類重逢定作歌

家仰山茂才以余暨楊君翰廷今歲重逢遊泮惜
國勢已更例不舉行作逸民曲七古一章見示

爰次其韻答之

八叉手捷詩吟溫速成舉世共推元嗣後詩壇誰繼起
詞句雖多空靡綺世間何限作詩人篇章過眼祇微塵
苦吟身世曾無補不如樸魯安齊民齊民在世原同衆
一任稱龍與誇鳳逍遙不費心血磨永夜酣眠無噩夢
回憶勝國已末年弱冠爲文豈曰賢偶向膠庠占一席
聲價原來匪值錢繼入棘闈頻橐筆選佛場名不獲一
消閒聊作秋蟲吟篇成豈與詞人匹緬思大雅言爲坊
公餘退食輒相羊據懷興寄關君國砭俗詞陳重里鄉
高吟匪計人爭售譽播鷄林成傑構墨客當時幾集編

語出驚人誰獨秀儒林文行貴能兼服官尤要在清廉
懸車退老歸林下撚髭相對笑鬢鬢我從庠士至白首
行年業已逾九九一事無成老於鄉愧見後生呼小友
豈知旣羣稱阿婆倏爾班聯紅粉娥昔戰文場原未將
俯仰隨人無可狀縱今遊泮喜重逢老婦簪花殊不肖
兒孫但祝壽算高鄉閭競說功名耀此心榮辱兩不知
吟詩暗裏偷自笑況值國步已久更無復科場事舉行
泮遊歲屆雖週甲敢效雄鷄再一鳴日惟病臥憂家國
在笥冠裳已易式世途終古易滄桑我老祇知眠與食
勸君切莫好吟詩詩吟興每借酒卮縱然不干時世忌

終令心力日交疲吁嗟乎戰南北爭華夷人生命運造化司隱逸豈能逃世劫漫學老子長守雌

奉酬各親友和重逢遊伴詩二首

佳章賜和徧琳琅頓令衰翁喜欲狂忝獲一番風雅興濫叨兩度泮芹香高情慶助詩盈几薄貺酬惟紙半張內問自知增愧歉拋磚却幸願能償

老去心情冷似冰忽教吟興驟然增不須面晤通酬酢儼屬神交信友朋衰朽却慚邀眷顧英豪彌切仰賢能縱今國是紛紜甚詩學還憑力振興

詠菊

重陽纔罷佩萸囊又見園中菊吐黃秋後經霜饒秀麗
雨餘帶月倍幽藏柴桑漉酒終朝醉老圃編籬盡日忙
爲想高情多隱逸天教晚節特留香

壽 梁母劉太孺人百齡開一榮慶

舞勺時剛就傅年憶從府上識閨賢

余幼年從師始識阿

翁旣屬通家誼

尊府與寒舍本屬通家

弱弟曾同結社緣

令弟自幼

同學共社

孝感已徵除母病

孺人割親

仁施常散恤貧錢好

生樂善臻遐福此是人間一女仙

作嬪當日賦于違內助賢稱遠播徽奉侍舅姑遵守儉
服勞夫壻懍無違閨房唱和曾編集兒女提携自浣衣

產得掌珠雙競耀一時門第羨光輝

夫是文豪擅作家科名喬梓兩堪誇嘗陪燈火深宵讀

更勗辛勤後嗣加倦繡鍼停詩入草

孺人前曾著
有繡餘詩草

含飴

襁負鼎煎茶夙徵具有幽閑德壺內雍然靜不譁

孀時哀痛欲捐生天佑吉人轉喪明酷愛異書猶遺誦

久通禪學復何營謙和在抱身常健節義堅持志不更

他日期頤堂五代花冠重誥倍尊榮

和黃君日坡紀梁文忠公節庵入祀河南天山草

堂七古一章次原韻

良臣節義不槩見歿後馨香宜特薦海南一老前清遺

聞名恨未曾識面自從遜位民國更舊宦鑽營尙忘倦
武人坐擁節旄高仕路馳驅阻英彥其中植黨互營私
內訌竟至成爭戰惟公壹志念舊君退守鄉園節不變
座聯朋舊與居遊孤忠獨抱人同羨自成一代作完人
遑計他年編史傳遺黎渴望和議成蒿目前途厭禍亂
時當秋後逼登高羣年久罷黃花讌閒居竊作秋蟲吟
風雨瀟瀟迷海淀仰思盛舉懷故人

余與日坡會一任
作廩保同事

驚濤兼駭電

賀番禺陳君崇鼎尊甫景周君七十九歲重逢

花燭
鄉榜

徵詩七律四首

八旬將屆喜重重花燭登科兩再逢梓室連枝名競顯
蘭階寶樹派羣從百年伉儷行增袞四代歡娛占素封
奇福如斯真盛遇漫誇寶桂與荀龍

偕老天教作合緣登科近接結婚年已欣喬梓名同貢
更羨夫妻壽並延膝繞孫枝頻點頷手携曾息亦隨肩
他時共慶期頤祝八豔行看佈几筵

天南燦著老人星特選重膺貢大廷珠海祥光增韻事
石樓佳氣仰芳型孝思至老存孺慕儒行資人作座銘
調恤鄉閭傳盛德觴稱八桂喜開屏

韜晦生平智若愚三多今且祝康衢不教脫畧從朋舊

一任矜持諂潤迂樂事偏增饒晚福宦情素淡本通儒
世間家慶誰堪比拍照長留瑞壽圖

賀順德溫幼菊先生六十一雙壽徵詩七律四首
夙傳閥閱舊家聲後起重看擅藝名早歲韜鈴矜碩畫
中年繪畫著閒情天機入妙羣爭購世德相承業獨精
花甲週館人並健一堂觴詠祝長生

宦迹曾經著勝朝巍巍高位俯羣僚傳家共羨書香遠
遺裔偏工畫法饒東粵論才恆輩出南離毓秀古云遙
共和國造滄桑後科學尤欽藝術超

端居在籍負長才督政同襄局屢開製造幾逾西法巧

褒崇疊荷北廷推承先踵武名隨顯述德流芬志益恢
勿謂畫家稱小技經綸曾此運鴻裁

敏捷詩才數八叉今增畫譜復名家簡編留課諸孫學
教育分權哲嗣誇德配齊眉資內助同儕拜手祝齡遐
七旬肇艷開雙壽花燭重逢慶倍加

中秋夕端本學校賀節招飲醉歸感賦

九旬將屆慶中秋學校筵開忝應酬笑向吳剛殷問訊
桂宮何日復重修

自罷文闈已六科今宵策學正搜羅憶從矮屋初看月

週甲重圓轉瞬過

余於前清辛酉歲初入閩應舉茲
科舉久廢又逢辛酉歲瞬一週矣

重陽日晏起孫曾輩稟知往虎遜巖登高爰口占

一律

耄年久罷登高興忽聽登高語幼孫一枕黑甜衾尙戀
半甌白粲酒兼溫醉餘展卷閒披覽客至扶筇共話言
迴憶朋儕同躡屐幾番赴約各攜樽

老境自遣

漫將百歲數前期此後光陰已自知買醉聊堪消永日
耽眠不必問何時已成廢棄人中物翻羨嬉遊世上兒
敢向後生誇閱歷空嗟夢夢悔應遲

東向雙手朝圓照次如湯湯盡朝照

華道不為問同利已與熱集人中餘國建編舊世主聚

雲初育並端曲臨北對武制已口世買精照集非水耳

手數白飯

酥餅散僧信臨別經香飯餘香餅餅

半湖似樂兩雙並領創見客開題更客空外氣共潮高

雲華入湖登高興感臨登高無收野一林風散雲散無

一將

養餘山房詩鈔

終

養餘山房詩鈔終

